



玉筍集序



世謂文章有臺閣山林之殊故其氣有溫潤枯槁之  
異文章固然詩之為道亦猶是也余獨謂詩之作也  
有正變焉正固為盛至于情發于殺止乎禮義又變  
之不失其正者也情之所發言辭出焉殺之所止禮  
義存焉故氣應乎外情發乎中若功業加于民聲光  
昭于時則其氣自壯和順積乎中英華見于外則其  
情自宛氣可以學而為情不可以強而至曾謂山林  
之不可為臺閣臺閣之不可為山林乎譬之太羹元  
酒醇醪雋永查梨萍菹淡腴酸澁食者各適于口而

其出于自然者盖不以氣而以情也余友鄧君伯言  
行純而學優才美而志遠少力于學壯而未行老于  
風騷乃有所得其為詩歌每出人意表簡而不踈直  
而不俚其間道氣運之盛衰論人事之得失徃、送  
容不迫而意已獨至使接踵陶韋間未見其大相遠  
也視所謂山林枯槁者盖不侔矣是果氣使之然與  
抑情乎哉嘗示余以所為玉笥集數百篇且求為序  
余因諷味省感焉嗟夫今之于詩道者或氣滿志得  
則不暇以為或羈愁窮困則不得以為若君者學于  
少得于壯成于老富貴榮達之心雖淺而溫柔敦厚  
之度愈深是果詩之幸與其六君之幸也與將見由  
變而之正由山林而之臺閣所謂宣宮商諧金石以  
鳴國家之盛者未必不在于君也吾老矣幸或見之  
尚當有徵斯說姑以是為序洪武乙卯七月既望臨  
川老友蠖閣道人何淑書

王筍集叙

余老處巖谷諸賢以詩貺余者二多矣及觀鄧伯言父王筍集為之竦然知其得之天趣異于強作之者也詩之搜羅以為富雕繪以為妍索幽以為竒放情以為豪若是者工則工矣謂得古作者之意則未也伯言之所造蓋已深故冲澹自然華不為媚竒不近怪雄不至放求合典則故宜然者哉前御史丁君子堅評其詩謂其好尚之專且久故清麗自然使居通都大邑觀明堂郊廟之盛發而為金鐘大鏞之音又當不止于是斯誠不易之論余雖欲加之一辭未有

能過之者也雖然伯言吐其胸中之奇以攬夫玉筍  
山水之秀亦奚有不足韋應物雖專城美祿而詩多  
泉石之趣孟浩然屏居草野無郊廟之著作而其詩  
亦顯伯言于韋孟近矣而進之益不已則知之者當  
益衆余之言何為哉特深好其集故因觀而畧論之  
耳洪武乙丑秋八月望蒙陽梁寅書

玉筍集叙

觀鄧君伯言詩如春風林塢卉木鮮麗泉石清冷時  
禽響答自然天趣有動人處由其好尚之專且久也  
推是心以往何事不可求使居通都大邑觀乎明堂  
郊廟之制作則又將有得發而為金鐘大鏞之音矣  
古有大史采詩以觀民風設令有之則君之五言冲  
澹中多古意歌謠善諷切最近人情有足采者矣尚  
勉焉以俟洪武丙辰之歲子月下澣前承事郎監察  
御史丁節子堅書

王筍集序

古今論詩以平淡為貴然欲造平淡者非工夫深至不能也晉陶淵明唐韋應物柳子厚三家世所謂詩之平淡者也以今觀之狀難寫之景于目前含不盡之意于言外其風調高古而辭旨簡遠有非區、模擬所易誠可謂深造自得者與或者以淺近視之是猶見玉器之天成而以為無事乎推鑿也其可乎哉予至永豐之三年聞新淦鄧伯言氏工于詩而未之見也一日其友徐伯澄來示其所著王筍集且曰伯言恬退之士於書無所不讀然皆以用資為詩其用

心勤矣舍于同里黎季敏氏垂十年而情好甚篤也  
季敏尚友而好義又深知詩將率同志哀其所著命  
工鍛梓以傳于永久蘄一言以為引余讀其詩大抵  
清遠條達不為險艱藻繪之語澹泊和平而無念懷  
哀怨之意蓋其情性然也抑上工夫深至造于平淡  
之域嗚呼其上有所于三家之風調者乎雖然余何  
足以知伯言昔者歐陽公曰知聖俞者無如修然聖  
俞所自負者皆修所不好聖俞所卑下者皆修所稱  
賞夫以歐梅之知而酸醎異好有如此者而況淺見  
薄識之士乎余何足以知伯言獨愛伯言用心之勤

而喜季敏能成人之美也故為書于篇首而授伯澄  
使歸之洪武二十二年春正月下澣會稽山人戴正  
心序

鄧伯言玉筍集目錄

卷之一

四言古詩三首

五言古詩一百六十首

卷之二

歌行三十一首

卷之三

五言律詩九十六首

卷之四

七言律詩一百四十首

卷之五

七言拗體十四詩

卷之六



卷五言長律七首

卷之七

卷七言長律八首

卷之八

卷七言絕句廿四首

卷之九

朝京紀行三十二首

鄧伯言玉笥集卷之一

四言

勤有齋銘


民生在勤、則不匱我思古人實獲我志乾、夕惕君子法  
之夜、為善聖賢同歸朝斯夕斯勤學不息悅我詩書芥視  
金壁人多逐利惟義是從人多偷安日省厥躬先知艱難後  
乃可逸佩服訓辭始終不失

題王氏可逸堂

其孫永安求賦堂扁乃  
三十八代天師所書

人生在勤、乃可逸動靜有常起處獲言懷哉爾祖善行美  
質樂彼邛園安此居室安此居室既幽且閒或漁于溪或樵  
于山漁樵之業奔競所棄爾祖樂之傲俗忘世風流既遠堂  
構猶存居之永安宜其後昆

蘭雪堂銘



乾坤清氣人物所鍾幽蘭灑雪袁室生風蘭有芳馨雪乃潔  
白孰能比之君子之德君子之德董陶以成我銘斯堂世守  
幽貞

五言古詩

擬古九首

鴻濛昔未判道在虛無間一泛開闢始二氣乃循環物各一  
太極人心胡不然聖神立綱常足以萬世傳  
龍馬負河圖鳳鳥鳴岐山羲文有聖德祥瑞出世間自泛衰  
周來古道日凋殘是以魯中叟已矣發長嘆  
夷齊聖之清天地生間氣仁哉讓國心忠矣諫伐意首陽雖  
餓死萬古終無愧俯仰懷高風吁嗟勸來世  
魯君昔好賢致幣顏闔家寧知賢者心視此猶泥沙一瓢自  
可樂萬鍾我何加雲山竟長往此道誰疵瑕

顏回在陋巷所樂非簞瓢仲蔚守蓬蒿素心甘寂寥斯濫豈  
我志固窮非一朝懷哉松柏姿歲寒終後凋  
賢哉楚大夫何事沈汨羅懷王信讒佞吾道成蹉跎守義死  
亦足偷生辱何多湘流若有恨千古作迴波  
四皓居商山名聲滿天下一出定漢儲仍作肥遯者谷中有  
芝草門外無車馬俛仰思若人富貴視土苴  
淵明守道者衆妙藏心胸讀書不求解吟詩不求工得酒兀  
然醉何曾計窮通斯人去已久舉世高其風  
山中有逸民峩冠大布衣悠然對松菊飲酒和陶詩落、忘  
世事嬉、如小兒超然慕太古猶將問庖羲

寄石門梁先生求刪近藁

聖人刪古詩足以垂勸戒愧我弱莛言存之欲奚待弱齡事  
蟲魚于茲三十載冲澹苦未到綺麗非所愛  
覺衰顏拊

卷增嘆慨陶韋邁前修虞范鳴近代潢汙耻溟渤邱垤等衡  
岱欲進力未能備錄意有在詩家有宗匠後學恒倚賴莖田  
藉鋤耘廢金假爐鞴乾坤固悠久海宇六宏大獨立回天風  
冷然響芋籟

題吉文劉觀瀾潛默齋

天道固不修言化機恒自然潛心悟至理以默守吾元回也豈  
誠愚賜給徒為便始知聖賢學妙在心相傳劉君事藏修築  
室文水邊桂香靜對易慕道尤精專為賦潛默詩三復其勉  
旃

題何同德獨善齋

兼善固所欲賦命有窮通獨善非傲世舍義將焉從侃、同  
德父學積于厥躬守己無外慕養氣恒內充岩穴託真棲幽  
軒酌筠松陶然有真樂俛仰天地中豈凌善一身庶幾屬澆

風

題陳敏求有裕堂

紛、名利場局促若疆鎖君子恒裕如進退無不可楫堂面  
溪山治地種花果無言以忘世所守惟在我

題一素齋

古道日凋喪斯人慕淳風誼囂厭城市結宇雲蘿中戶牖不  
丹堊門閭任蒿蓬但知琴書樂寧憂簞瓢空來往有賢士品  
題多鉅公清風動修竹白雲在高松終始慎一素令譽垂無  
窮

題靜寄軒

開軒納虛曠默坐觀無始身外忘世紛靜中究元理棲禽托  
深林潛魚在淵水與物兩悠然勞生念行子  
知止軒為謝伯安賦

鳥雀依叢篁鯨鱈在淵水飛潛各自適所貴在知止攸物尚  
知止况人為物靈最若止於善庶以善自名

題黃氏清嘯軒

異境何幽偏羣山甚竒峭中有間居人憑軒發清嘯聲聞忽  
半嶺響答復千竅颯陰風來啾啾老猿叫脩然塵外心允  
矣靜中千載蘓門生惟君可同調

題謝士彥草池書館

開軒瞰清池光滿懷抱東風扇微暄一夕生春草冥觀造  
化心頗悟聖賢道簡編時卷舒精義浚深討猶憶夢西堂君  
家舊文藻

題何幼恭雲門歸隱圖

朝遊金陵館暮憶雲門山誰知軒冕榮不及推蘓閒歸來看  
瀑泉興在陰崖間松風有清響古琴不須彈冉冉白雲起翩

翩孤鶴還超然出鹿網似覺非人寰

題黎氏滄洲圖

滄洲大江水丹滄洲雲蘭社有香氣莓苔無俗氣始數家臨  
絕岸一艇橫通津漁唱落霞晚鳥啼芳樹春對景閱圖畫樂  
哉棲遯人

耕樂為黃送禮賦

鳴鳩鳴高樹科斗散平池甘澤既已足播穀當及時俛焉佩  
古訓服田不知罷躬耕寧為耻所樂實在茲豐年黍稷登庶  
用給公私飽尊湛香醪羸肩以肥農談共隣叟鼓腹常熙  
熙人生貴力本汲將奚為陶然上皇逸載誦幽風詩

題胡志同雲松巢

高風慕太古喜結雲松巢冷松復冷柏茸雲如茸茅氤氳翠  
色含渾淪元氣色謫仙本同志巢父為舊交徵起拜龍衣乞

歸吹鳳範還將御賜筆挂在凌雲梢  
高風莫盤泉為李原初賦  
盤中有真樂君子恒慕之徑轉得幽處泉流無盡時潭深老  
龍蟄藻密潛鱗依俯瞰照鬚髮渴飲清骨肌忘情或漁釣洗  
耳無是非吾才匪韓子愧爾來徵詩  
古信題謝氏堅白齋  
堂東有白石堂西有白石堂南有白石堂北有白石圍名  
天成光彩眩玉色者之可充飢拂之可為席磨涅不磷淄宜  
比君子德若人好斯堂因之扁堅白

題宋彥輔梅屋

幽人愛孤芳貞白比冰玉寂寞竹籬間相依結茅屋久香似  
無聞一清如可掬不有銑石心誰能伴幽獨

鵝溪釣叟為陳充肩賦

前林帶溪水湛湛寒潭深垂綸不設餌魴鱖自浮沈明月照  
孤艇清風飄素襟物我俱兩忘悠然塵外心

贈道者張回風時寓居雙林寺

回風西北來入我雙樹林松聲常在耳彷彿竺桐音靜時若  
有得動處元無心矣天訪禪字為我開煩襟

寄陳伯玉徵士

弗雲推

桃李耀芳園芝蘭翳深谷世人競紛華君子秉貞獨緬思雲  
推翁中心澹無欲懇切辭簪纓還山養麋鹿  
養鹿春草肥推雲碧山深投閒固所願沽名本無心清澗可  
濯足微風六飄襟蕭然坐盤石長歌有餘音

君歌我還續散入雲霄間能使潛蛟舞六招飛鶴還依稀在  
仙島恍惚非人寰擾當世士胡為多苦顏

青山白雲中人為陳知縣賦

青山何逶迤白雲時卷舒相看兩無心幽處真自如斯人在  
巖壑承詔升天衢回首瞻白雲浩然賦歸與朝與白雲對夕  
同白雲遊縹緲落窻戶氤氳拂衣裾雲中何所樂所樂在琴  
書常恐白雲散門外來徵車

題高山流水圖

泰山一何高江水上以深寧知伯牙絃妙合鍾期心清風邈  
千載大息誰知音斯人好古調拂軫徽黃金一彈元鶴舞再  
彈蒼龍吟翛然山水趣得之在胸襟畫師上好古能畫復能  
琴援筆寫幽意溪聲風滿林

題李次晦明復堂

寶鏡出匣中塵垢乃翳之一朝事拂拭鑑物分妍媸霧臺素  
澄湛利欲或昏迷誰知方寸間至理森在茲先師有明訓于  
以覺後知性善苟能復聖賢可同歸

題鞠孟端悠然亭

淵明住柴桑門無車馬諠青山如故舊一見心悠然若人慕  
高風作亭臨水邊高柳三五株蘭菊六鮮賓朋日過送飲  
酒和陶篇悠然得所樂庶以全其天

題陳寅賓暘谷齋

高齋面暘谷四序常如春挂巾扶桑枝晞髮迎朝暾雍熙逢  
治世俯仰信乾坤未知羲和事自是堯舜民

題何氏南塘舊隱

陰森野竹寒繚繞南塘幽窻虛納翠靄門間俯清流中有隱  
淪士抱冲真寡儔垂綸聊自適守己澹無求俯仰憶先世道  
遥寓斯邱為歌少陵詩勉旃繼前修

題李氏維稼堂

逐末成澆風力本化淳俗遐思在古人播植維嘉穀斯堂俯

青郊窓戶蔭高木了無塵事侵稍喜生意足維時沛甘澤良  
苗靄新綠辛勤願有秋飽煖更無欲唐虞致雍熙業許樂幽  
獨為子歌韓詩清風起盤谷

題樂間堂

為善真可樂無營心自閒奈何世之人汨沒塵埃間是中有  
佳趣游目皆青山依山楫堂宇白雲鎖松關古意閱圖史幽  
香聞蕙蘭尊前好風月泉響當鳴彈

題內弟吳大使子充墨龍

神龍潛九淵變化恍難測伊誰寫真形一覽壯心魄淋漓元  
氣濕慘愴風雨黑終當上天門四海望涓滴

贈相士黃逸仙

伯樂善相馬一顧增千金荀子頗知道相形先相心黃生師  
唐舉於善尤精深取人或漁釣所遇多纓簪嗟我守貧賤辱

子過雲林未示衡氣機贈以離別吟

黎氏積慶堂詩并序

積慶堂者故處士黎君達山之所作也君質美而  
好學見善如不及且好施與里之貧窮患難者咸  
德之壯遊燕都謁名公卿多進之以禮已而世殊  
事異乃歸老于滄洲之上有良田廣宅為子孫計  
而樂于為善前監察御史胡公行簡與君在燕都  
時為舊交暇日過之喜君歷世變而壽富康寧子  
若孫環侍左右衣冠禮樂蔚然有太平之風謂皆  
君之積善所致乃為顏其堂曰積慶且為之記以  
彰君之德洪武壬戌余始獲與君之子季敏遊于  
滄洲之上時君去世已期年矣追思曩昔嘗識君  
于翠屏山中挹君之風采誠有願交之志而恨相

見之晚也嗚呼君今不可作矣余既登君之堂又  
惡得無情哉謹賦五言八韻以述君之德并以勗  
其後人使勿替引之則君其可謂不亡矣

積善有餘慶不善有餘殃至公在司造報效亦已彰蔓草務  
去根猗蘭願留芳人心與天理好惡乃其常駟車于門高五  
桂竇氏昌陰德信有徵福澤其無央斯堂扁積慶著善斯不  
忘後人繼芳躅矣世垂休光

東同宗仲偉

流水本同源叢蘭亦有根匪有董猶異而無汪涓分余忝高  
密喬念君六聞孫禮服既悠遠歲月復馳奔相視如路人莫  
知早與尊茲晨得良晤永託為弟昆所重骨月親貴賤安足  
論我昔歷艱苦慷慨心欲言八齡失所怙有幸慈母存鞠育  
與教誨天地同深恩亂離廢舊業詩禮猶清門不敢忝厥祖

佩服先哲言為君寫衷曲短筆聊復援

外甥吳緝字克熙洪武十二年二月客死于景陵時  
年二十八余哭之慟賦此以誌余哀

人生天壤間修短難一致吾甥昔四人今焉只存二緝也頗  
聰明風骨亦殊異總角事詩書英年抱材藝山林厭拘束湖  
海多意氣辭親遠服賈霜雪逼殘歲昆弟爭挽留同侶復牽  
制別去一月餘還附手書至悲風忽重來聞作景陵鬼景陵  
在何方西北數千里黯黯荆山雲茫茫漢江水白骨埋黃沙  
荒阡復誰奈吁嗟乎蒼天奪汝竟何意惡草常蔓延幽蘭易  
凋悴我思平生情悽愴裂肝肺親老子尚孩相看祇垂淚汝  
父客嶺南歸骨已無計汝復沒他鄉不鑑覆轍弊作詩招汝  
魂仍以戒後世

送何正夫西遊



野老守貧賤無營方漣畦故人將遠適問我審安危窮達固有命行止二有時人能不違天履險如平夷君既悟斯理行矣復奚疑

寄興平稅使何維翰

自古有離別余今獨傷悲關河數千里輾轉勞夢思時序候以遷容鬢日以衰蕭蕭朔風寒香孤鳴飛欲往良獨艱相見詎有期商歌意無限零泪忽霑衣

高允憲先生客習氏館中清風修竹備然有塵外意

喜而賦此

蕭蕭池上竹颯々林間風來為誰清乃與君子同君子秉貞節備然在山中歲寒不改操結交梅與松

客館歲暮別友人

齋居僅一畝旅寓將五旬盈几散書帙並坐儼冠紳送客談

妙道彼此樂清貧燈孤不成寐歲晏喜相親寒氣正催雪梅香偏襲人情深忍離別詩就寫殷勤

夜坐有懷丁御史子堅

山齋夜岑寂落木含淒風青燈照孤影幽思浩々窮人生無定居飄轉如飛蓬美人在何許使我心忡忡援琴復置之默坐想音容

月夜有懷曾主簿伯曼

華月照虛館悲蛩鳴草根閒情還脉脉離思更紛紛感慨不成寐羈孤誰與論惟應棄官客佳思寄琴尊

寄陳壺隱

十年不相見遠客梁宋間詞華動侯伯羈思滿河關歸來厭世事采藥遊名山猿鶴共吟嘯漁樵相往還有情泛佳菊無語對叢蘭即此羨閒適營々徒險艱

寄鄒椿齡

大隱在城市小隱居山林所居雖異地所樂還同心我謔小山詞君彈流水音相知既已久相憶思難任何時遂盍簪綢繆話胸襟

寄李如愚

黃葉林中深幽泉竹根冷徐步下逢人雙飛見禽影偶傷良晤乖暫喜塵事屏佇立遙相望微雲隔松嶺

寄曾隱君大雅

其所居堂扁曰東樂

高山列屏障下有幽棲人崖壁饒古意軒窓多白雲松陰覆几席蘭氣襲衣巾其樂似東老熙熙滿懷春

北平檢校謝叔賓謫官嶺南詩以寄之

幽燕春苦寒嶺海冬尚熱寒暑君備嘗相思最愁絕君懷自夷曠君心秉貞節所願濟斯民難艱底須說皇天幸與私白

日照丹闕

寄畫者彭子惟求作松下煮蒲小景

高情似王維妙畫國無匹絕島與寒汀揮光兔筆飄然江海蹤佇立懷高風為作老松樹下著煮蒲公

江上有懷曾主簿

歸鴻不可留去鶴尤難招朔風起離思短髮寒飄蕭遠樹帶斜日滄江生暮潮雙飛愧鷗鳥獨立心搖

江上覽物有感

愁懷似江水汨汨無時休俯仰今古意淒涼天地秋鴻飛避矰繳魚躍驚綸鈎所幸遂天性逍遙在滄洲

讀陶淵明詩二首

吟詩不須苦吟苦失詩意吾咲郊島凌彫鏤損肝肺凱風因時來微雨送東至憑几誦陶詩中有深味

我性愛陶詩難窺數  
仗墻間來輒誦之  
愈覺滋味長大美  
益梅土鼓諧宮商  
誰能起公死執鞭  
向柴桑

醉中作

平生不嗜酒、至苦難避  
黽勉事勸酌聊樂賓  
主意重觴即陶然兀坐  
時假寐君當恕醉人  
我已忘天地

讀道書作

籬落帶幽篁繁陰翳  
虛牖蕭然坐團蒲  
布衲蒙衰朽平生好  
清虛道帙常在手  
意會欲忘言欣然復  
良久

有感

昨日天氣熱披襟坐  
林間今朝朔風勁覺  
我衣裳單氣運有  
盛衰天道常循環  
富貴何足羨貧賤何  
足歎

暮歸途中作

殘陽在林梢孤鳥度  
微影行人念歸程  
十里隔松嶺蕭蕭風

色寒漠、煙光暝稍喜  
近人家溪橋接村徑

客中逢鄉人得家中消息

去家不忍別久客遂  
忘還忽見故鄉人  
與語增感顏比隣  
害疢癘羣泛六凋殘  
所幸一室安衛生良  
獨艱語終對斜日一  
鳥鳴空山意存恍惚  
際心在悲喜間

暮秋感事

寒風起蕭瑟落葉鳴  
空堦榮枯固常理  
時事何其乖俯仰慨  
今古無由舒我懷  
皇天六愁思白日常  
陰霾

歲暮山中夜坐

冉、歲將暮沈、夜初  
永木落風生寒窻  
虛月流影四隣寐  
無誼獨坐山齋靜  
孤燈照殘書妙道  
得深省

元正後雪霽遇鄰曲

晴岫消凍雪春郊  
布匹陽嚶、幽鳥鳴  
靜聽如調簧興懷  
訪

故交徐步登前岡石竇通泉脉林隈散梅香稍欣得勝地復  
喜升華堂交慶遇歲始共語思時康願言課孫子讀書力農  
桑

午睡初醒景與意會援筆賦此  
綠陰滿庭戶苔色上堦除數叢幽禽語一枕清夢餘起視日  
將午隱几觀殘書陶然若有得心存太古初

山行

山行不逢人山鳥隨我飛松風起澗壑草露霑裳衣獨立愛  
蕭爽此心忘是非何由跨仙鶴一往尋安期

喜雨二首

甘澤被邱園良苗似膏沐杖藜恣逍遙滿眼生意足野飲攜  
甌樽農談過隣曲躬耕幸有年何用干微祿  
簪纓世所榮犂鉏我所安况茲蒙潤澤豈復憂飢寒園中摘

蔬果按上羅杯盤諸孫戲我側俯仰良可觀山妻碩子咲自  
足平生歡

喜雨寄諸友

仲夏風雨多蕭々涼氣生憑軒望原野品物皆敷榮唐虞在  
上位海宇際升平豐年况有象一飽更無營喜來賦新詩持  
用寄高朋

雨後作

山中足時雨蕭然爽如清秋飛泉灑絕壁白雲被高邱我性好  
冲澹忘心事雕鏤興來且斟酌吟咏當歌謳

至

清晨訪故舊及暮始言還發棹風雨至去留良獨難小舟如  
一葉出沒波濤間兀坐喪神魄相顧慘不歡此身盡沾濡那

復惜衣冠在險猶倉卒歷險心始寒  
送茲慎行止寧復嬰憂患

對庭樹

庭隅有佳樹偃蹇繁枝柯長夏蔽朱炎  
蕭々涼氣多元蟬噪其間好鳥散相和  
余亦性所愛對之聊詠歌

青山有高人

青山有高人澹泊無所求雖能抱材藝  
不肯干王侯龍劍藏寶匣霞衣住丹邱  
浩然足清興何必神遊

晚涼訪隣曲諸友

晚涼步幽徑微風飄衣襟悠悠何所思  
所思在同心隣居二三友託好在雲林  
寧憂貧與賤所樂書與琴間時輒相過  
有酒能共斟醉時各分散明日重相尋

夏日有懷丁御史

永晝倦煩燠披襟倚南窓浮雲忽凝陰  
鮮飈喜微涼心境適澄靜脩然塵慮忘  
故人應此際高臥到羲皇

送鄧吾貫往山東省親

天地司化育品彙咸昭蘊懷哉父母恩  
實與天地俱生兒待終養服勞報勤劬  
兒幼父行役傷心復何如憶昔初別時  
痛哭牽衣裾關河數千里風沙各天隅  
堯舜在上位山河歸版圖雲屯齊魯邦  
四境今無虞覲省戒行李艱難涉長途  
是時朔風致野樹寒蕭疎出門指天日  
見父乃旋車送者為之感聞者為之吁  
純孝敦古道性善由厥初茲行畢素願  
勗哉慎其軀

早春踏雪遊羣玉山中

山中春早春澗道積冰雪屐齒碎瓊瑤  
行吟思清絕仙人乘素鸞飛下白銀闕  
授以長生方金茎和玉屑

贈星數陳鶴舉

天運固有常命理亦以微先聖既罕言後學鮮能知巫咸實  
詭秘虛中頗神奇衰旺酌五行禍福剖衆疑寥々千載下術  
者誰繼之斯人襲世業造化窺璿璣最哉師古人庶以鳴當  
時

遊金坡道院

曾閱金坡圖未訪金坡仙山茲晨覽勝跡恍若非人間香靄數  
峯合蹁躑孤鶴還壇高聳石壁雲白鎮松關感慨劫灰後遯  
遊西日殘長吟下山去塵土復愁顏

謝李文煥贈圖書

圖書重斯文及法從異代大巧人競為古拙吾所愛人生如  
駒隙俯仰增歎慨感君勒姓名或可傳千載

此老

此老日無事悠然天地間臨池羨游鯉倚檻愛青山心與白  
雲遠意同芳樹閒送渠逐聲利負樂獨希顏

余性資庸下學術空疎白首無成私竊自慨然先儒  
有言自天子以至于庶人未有不須友以成者乃作

取友詩一章

友道非細故乃在人倫中取友以輔仁庶幾反溥風損友不  
可親益友宜與同非資共咲語實賴相磨礱取友不失人德  
義日以充所以君子心此道尤敦崇一日不獲見使我憂忡  
忡槿心但朝暮桂性宜春冬陳雷與管鮑令譽垂三窮爰作  
取友詩予以告羣公

送鞠孟端赴京

大明麗中天仁風被寰宇子抱經濟才義冠謁明主送容陳  
典謨慷慨論今古欽哉輔唐虞雍熙幸重覩

寒夜自釋

掩卷坐良久自傷還自釋時命偶未遭詩書其可惜囊中有  
焦桐取之還拂拭應有知音人一彈三嘆息

客夜

窓虛暎華月砌冷鳴寒螢悄、客懷薄沈、冬夜長經時去  
茅屋百念生蒲床年華等流水鬢髮明秋霜何如守元默歸  
臥南山陽

感興

烏兔迭循環山川自流峙悠、宇宙內人生獨能幾榮華如  
飄風世事若流水安得求長生後天興終始

故上海令黃子律哀詩

子律名鍾吉之永豐人也業儒尤工於詩有盛唐  
之風洪武癸亥春以賢良徵至京師授上海令上

海地廣賦多民囂于訟稱為難治君至平弊政施  
恩威民皆悅之既而以罪去官執法者令服徒役  
未幾遇赦免君望闕謝買舟南歸因中暑抱病歿  
于清江之境其友人具棺衾權殯于新淦之

柩洲君與予同歲而生余少長數月每切磋琢磨  
誦明雅道有益予者多矣于其卒也寧不為之  
輿傷也哉乃作詩以述君之行以志余之哀也

葛溪有臞儒冰雪瑩懷抱世事澹無營經史日稽攷蹇予素  
相知同年復同道誼重比金蘭才高擅詞藻前年赴公車異  
縣得國寶庶勤恒自守始終竟莫保賜歸荷皇恩抱病因熱  
惱望鄉無百里淪沒殞江島嗚呼哲人萎寐冥青山老痛哭  
悲風來愁雲翳穹昊

雨後寄何幼恭

積雨生夏涼微雲凝午陰  
逍遙庭樹下拂拭朱絲琴  
流水滌煩慮好風飄素襟  
誰能同此樂惟有故人心

喜雨示諸生

乾坤開泰運時和致年豐  
仲夏甘雨足黍苗既芘  
清晨出東郊談笑值田翁  
辛勤乃有獲鹵莽難希功  
感此還自嘆耕學理則同  
送茲共勉勵三使愧良農

自嘆示贊貫二子

少壯頗踈懶老至精神疲  
雖耽古人書晝誦夕已遺  
拊髀常自嘆人生果何為  
良田不耘耔年登恒苦飢  
為學不勉勵歲月空自馳  
悔悟雖已晚踐履斯其時  
作詩示汝曹盛年當勉之

秋日憶姜仲實

秋風吹庭樹黃葉紛  
落時序有更遷愁懷自蕭索  
俯思年

少時攜手共行樂容鬢今不同  
交情宛如昨

秋日憶何同德

結交三十載回首如一朝  
往事君莫論別恨終難消  
秋風感衰鬢皓月懷清標  
吾道其已夫斯人甘寂寥

讀淵明詩

霜風透窓隙皓月流清輝  
良夜誰與同孤燈對陶詩  
新意有得舊題頗知非  
送茲循軌轍庶免惑多岐

冬夜懷曾君季孫何君有大

良夜霜氣肅繁星麗高天  
微風響殘葉徒倚臨前軒  
時物有榮粹容華非昔年  
人生會能幾憶別心煩悵

北平掄校謝叔賓左遷廣東仁化縣幕職復以朝賀

後期謫雲南安置余于叔賓為姻友昔別各淚下沾  
衣今相去萬里而三載不面烏得無情哉



別淚不可忍相思心愈傷雲南瘴癘地十月無冰霜天運有  
往復聖情思否臧終看沐休澤昆勉安其常昔限谷新下

題嚴氏釣隱

尚父遇西伯子陵辭漢光胡為異出處所貴安其常斯人樂  
漁釣榮辱俱兩忘桐廬在何許煙水自微茫我性愛樵牧  
心慕軒裳為君發吟詠有興在滄浪

題鄒氏養浩堂

二氣生天地運行無息時惟人在所養失養在餒而所以君  
子心操守 或違充然集眾義勇往將奚疑君家本儒素養  
浩畫堂相旨哉孟軻言允為百世師

寄艾錄事潛虛

南州有一士養浩歸園田與世素寡諧尚友千載賢濁醪泛  
佳菊細和淵明篇而我慕斯人離別今有年雲山渺之際安

得同周旋

寄王知縣彥暉

辭榮抱幽獨足以全其真舉瓢酌山月掃石眠松雲吟謫謫  
仙侶栖遲巢父隣何當訪猿鶴送此遠塵氛

江上有懷張叔恭

清川日悠、遠樹何蒼、羣雁向北飛孤鶴獨南翔美人樂  
棲遯采薇陟高岡相思不可見煙霧正微茫

雨中寄張文凱

川原春夏交淫雨無休時閨門掩芳草隣曲往還稀遠樹帶  
雲靄山鳩猶暮啼懷君當此際欲往畏途泥

聞徐縣丞伯登館中病起

大江何瀾漫咫尺若千里注目廬山雲懷君病初起春言托  
交情金石良可比離別慨經晴楊花逐流水

悼亡

衰年失內助撫事懷百憂傷哉兒女情哭泣無時休感慨裂  
中腸涕泗忽交流悲風既慘、白日空悠悠、容顏不復見恩  
義莫能酬恨無神仙訣千歲同優游  
憂思不能忘鬱結何由開一杯強排遣頃刻還復來落花隨  
春風片片拂簾幙不見閨中人韶華成寂寞

出還

將歸懷百感及門愈悲酸入室見虛位痛哭惟憑棺德惟起  
悲風白日淒以寒九泉不可作長夜何漫漫、月缺有時滿壁  
毀終難完莊生自曠達我獨摧心肝

滄洲對月有懷路川何先生伯善寄此以代手簡

峩、華蓋山下有隱者流餐松養性翳築室事藏修豈曰薄  
軒冕世異還歸休閉門恒著述拄杖或夷猶宇宙慨千古煙

霞娛一邱相思對明月羈思滿滄洲

聖主得賢良詩

高天羅萬象巨海納眾流盛世逢休明俊彥皆羅摎虞舜舉  
元凱湯武用伊周典謨訓萬代仁化洽九州吾皇法古聖令  
德日以修求賢不暇食日為蒼生憂杞梓入廊廟檇櫟在林  
邱作詩繼雅頌上足替皇猷

江上有懷石門梁先生

微陽落平沙高陽帶殘雨客思墮微茫漁舟泛容與蕭然來  
遠風獨立誰與語悵望西飛雲相思渺何許

題孫氏巖雪齋

天生小崆峒屹立太古初元冬積皓雪瓊樹高扶疏爾性愛  
清潔對之還結廬誰憐苦寒夜相映讀羣書

題吳大使文昌觀海圖

波光涵太虛樹色帶青靄宇宙一何悠山川長不改逍遙涉  
層臺俯仰成千載欲與沙鷗盟扁舟上浮海

題吳南任樓雲樓

朝訪樓雲人暮登樓雲樓山深雲氣合樹夾翠光浮溟 若  
大古逍遙及涼秋心游宇宙內契合神仙流

四皓對奕圖

山中茹紫芝石上奕殘碁勝負本無意行藏斯有時高風惟  
見畫白髮搃成絲拊卷懷千古徵公漢祚危

友人陳仁輔好古之士也效古體以贈之

古人不可親古道不可離古貌人所見古心誰得知陳君頗  
好古要我題古詩古讀風雅道古仰庀義懷古在鴻荒感  
古長歎歎

學山詩為徐縣丞伯澄作

祖晚山父如山  
故自號學山

天行本無停一息可萬里人學法乎天乾一詐能已譬如欲  
為山初焉覆一簣豈暇計歲功未成安可止一朝成高山萬  
古蓄元氣雲霧含氤氲松柏藹蒼翠廟堂需棟梁風雨資大  
庇未成一簣者視此寧不愧偉哉學山翁善學足能志  
眉山入專美假山記

友人張季倫喜予五言古體蒙見和賦此為謝

東坡慕淵明往々和其詩願我復何人謬蒙君子推林園無  
異歡吟詠每忘疲感君屢賡歌恍若奏金徽魏晉世已遠高  
風今見之七襄不成報臨風泐予思

題黃伯原友鶴軒

人倫重五教物類稱四靈奇哉九臯鶴上復載諸經性潔無  
與比君子化其形巢雲松柏高警露風月清是以貞素士取  
友非虛名紛々重勢利幽獨鮮交情豈不愧鳴鳥時聞求友

殺

題教膳部歸田卷

聖代徵賢良山林有遺逸斯人抱奇才歛起輔王室鼎鼐事  
調和禮樂正得失送客近清光明哲保終吉賜歸憫者年養  
道得閒日田園未荒蕪林木正森鬱蘭香襲衣裾竹色映書  
帙支頤靜看雲發興或操筆貞素為己有榮辱視外物余生  
六棲遯嘯傲煙霞窟安得送教仙燒丹蛻凡骨

秋日覽物有感寄丁御史子堅

鴛鴦有定偶鴻燕無同時覽物遽興感懷人復生悲情深託  
綢繆道遠成睽離疑義誰與析良晤終難期我、萬峯高瀾  
瀾清江肥何當共釣游永與塵事違

題金好仁樂志堂

城市與山林誼寤本不同澄心即淨域豈必在山中斯人守

一屢澹泊猶古風圖書列左右日月送西東俯仰無愧怍行  
藏任窮通悠然觀萬化其樂那有終

題謝彥剛養浩堂

培根枝葉榮養氣身體充體充本無物道義存乎中孟軻真  
亞聖立教誠有功一登養浩堂俯仰懷高風

題錫氏圭峰樓

層樓面圭峯峯色自蒼翠隱几聞松聲開軒納雲氣神清餐  
沆瀣境靜隔氛翳對此彈絲桐中含太古意

題吳克承雅穆堂

喬林蔭豐溪中田梅華屋靡、庭下蘭猗、檻前竹端居習  
儀禮少長咸雍睦春醪介眉壽動止膺百福允矣斯道存庶  
幾敦薄俗

題符氏靜軒

...

陰陽本無形配合乾與坤陽動司發育陰靜乃歸根冥心觀造化至理諒斯存何當掃閭軒日與靜者論

題高子完具慶堂

斯人薄世榮所厚在倫誼楫堂奉雙親綵衣日娛侍崔嵬霧椿古豐茂護草翠培養全其夫南陔庶无愧

登羣玉峯

羣玉有佳處臨臨詣宿心千巖互隱見萬木含陰森極目小天地曠懷無古今臨風一長嘯孤鶴下遙岑

晚興

西嶺下紅日前林生白煙憑軒散游目歸翼何翩、彼初自間適此身胡不然冥棲在岩谷養道希長年

中秋夜客中思親

明月今夕圓良朋一時集四座各歡娛中懷獨憂悒所憂浩

無端所慕嗟何及清歌那忍聞背面成悲泣

雨後訪江上親友

今日天微和駕言適江口春風如有情拂我沙頭柳上有黃鶯鳴閑、苦求友感此懷故人文深別離久相逢且論心豈在接杯酒古道良可敦浮名復何有

雲谷為王笥道人賦

幽意在雲谷高風懷攸亭東西雖異地復此託嘉名杳靄翠峯合氤氳佳氣生窻虛白日晚衣濯暑天清坐石對仙客焚香觀道經松花宜酒味泉響當琴聲窈窕絕塵鞅逍遙違世情何當托棲遯服食致遐齡

偶題

平生寡嗜欲所好在吟詩朝夕吟不已鬢邊已成絲幼女頗解事長跪陳戒辭吟止適情性勿使精神疲深感吾女言而

我樂在茲一日不吟詠滿懷動憂思阿女頌予哂予心還自  
怡春風入庭院花陰滿前墀清興不可遏把筆更須題

春愁曲

昨莫思出遊今朝還復止瀟瀟風雨散  
在春愁裏落花沾  
污泥片飛不起何事與閒愁共付東流水

莫春閒居

冉、春已莫瀟瀟風雨交殘紅付流水新綠陰  
衡茅元鳥識  
時序雙、尋故巢靜中方遣慮憑几玩羲文

春日寄丁御史子堅王知縣彥暉

光風拂柔條膏澤被幽草翟雉羽毛鮮倉庚語音好彼物各  
生成吾年獨衰老感此惜韶華觴來即傾倒  
栖遲托邱園窮  
達付穹昊却憶同心人貞堅永相保

仲夏

仲夏足時雨良苗被東臯辛勤畢農務餘暇且遊遨  
攜杖歷  
阡陌涼風吹鬢毛公劉世已遠守拙謾希陶

讀淵明詩

古詩出性情氣運關盛衰聖人既刪述可以弦歌之  
後來習  
習俗倚麗誇當時淵明本清真冲澹乃其宜我性頗淳樸平  
生愛其詩駕駘事鞭策安得同驅馳

丙寅歲飢且旱禱而遂雨

驕陽欲肆早我心日憂煎攄衷訴真宰甘雨旻沛然况復連  
日陰潤澤斯能全晨登隴畝間眺望涼風前嘉穀總生意衆  
草上鮮妍始知天地心長育無枯偏我生食破硯亦有東臯  
田年飢幸豐稔喜極著斯篇

余居金川玉笥之間以漁樵耕牧為樂賦詩四首

落日照廣川嫋嫋垂釣絲遠風忽徐來飄飄吹我衣彼物恒

自得此心澹忘機渭川不可想元真乃吾師  
白雲滿青山、深雲自閒朝、躡蘿逕伐木向雲間鳴鳥出  
幽谷流泉響潺湲負薪行且歌世事無相關  
藟、墻下桑茂、隴上苗開春理農務生計願豐饒時雨夜  
來過滿田嘉穰抽欣然頽兒女一飽復何求  
耕田藉牛力牧養湏及時驅之入郊原泉甘春草肥扣角聊  
復歌日莫徐、歸送渠笑負賤頗勝蹈危樵

明明中天月

明、中天月良夜流清輝自送開闢來不知幾盈虧人事有  
代謝天地無窮時安得求長生對月常吟詩

飲酒

淵明好飲酒重觴即忘天李白性所同自稱酒中仙我素不  
鮮飲、少上陶然酒能助詩興一斗成百篇我飲僅數杯我

吟上數聯誰知醉吟中其樂不可言

月夜述懷

貧賤非可樂所樂安其常終、名利塗而我業田桑朝出自  
荷鋤莫歸還舉觴微、山風來皎、明月光幼女勸加餐諸  
孫牽我裳相頽聊一哂萬慮俱消忘

洪武丙寅有妖僧誘愚民為亂不旋踵而敗有感而  
作

乾坤蓄四德品彙資生成彼物固蠢然人心本虛靈奈何庸  
愚者往、輕其生大義廢綱常春秋重典刑中心懷惻隱作  
詩垂戒懲

釋疑

杞人憂天傾晝夜忘寢食吾嘗笑其愚今為眾所惑賴有聖  
賢書潛心豈云得至理不可誣渙然若水釋

題陳伯霖竹深處

何處還清幽乃在深竹間天風動琅玕鳴珮聲珊珊翠合帶  
煙色陰森生夏寒運微通窈窕意適任盤桓屬操歷冰雪安  
巢栖鳳鸞客來須往造蓬戶不曾關

與故人論詩

故人賞我吟搥紙索我題展席臨清風頗覺心神怡幽禽何  
方來和鳴在高枝文魚上游泳新水初盈池對此發清興援  
琴賦新詩鄭衛非所好鮑謝難同時古人如可作淵明真我  
師

述先訓

先親有遺訓家本積慶門富貴非所好以安遺子孫堆床積  
編簡繞宅置田園世力耕學餘事安足論苟能慎所守我  
死如生存總角佩先訓自勵窮朝踵行向耳順白髮日以

繁恒恐墜先志作詩貽後昆

菊逸為張與謙賦

淵明避世俗種菊繞東籬高風邈難逮幽趣鮮能知時有慕  
陶者愛菊上如之飲水可延年餐英可充飢培植千萬株而  
露日以滋草木遂天性人豈殊于斯優游樂肥遯氣充神且  
怡彼哉逐殺利於道乃相違何如委窮達閒飲誦陶詩

次錙俊欽見寄韻

微風度雙鳥落日鳴孤蟬悄悄動離思悠悠傷莫年因思同  
心友載誦傳雲篇俯仰天地內夷猶江水邊漁舟間白日旅  
舍隔蒼煙踰月不相見來詩娛目前

擷蘭生詩為陳長文賦

吾觀天地化草木上已蕃光風汎九畹膏澤被崇蘭美人擬  
為佩采幽岳間何當遺所思報以青琅玕



客歸遣興

旅館厭逢迎，還家少來往。山風時自生，浙漉有清響。三言玩  
羲文，陰陽識消長。動靜各有機，澄心得所養。

病中

平生厭拘束，所好在遨遊。淹旬抱寒疾，閉戶擁衾裯。地爐燒  
捐拙，滿室青煙浮。開軒畏風色，面壁心煩焦。鄰曲相慰問，警  
效弗能酌。良醫不易致，藥物忘所投。至人善調攝，失養將何  
尤。送茲保元氣，天地同周流。

寄李伯韶兼呈梁徵君

乾坤蓄清氣，日月垂休光。聖明既有道，文運亦以昌。羣才生  
斯世，李君乃其良。雄文煥星斗，令德猶圭璋。我思見其人，道  
路阻且長。翩、雙鵠舉，翮各飛翔。為吾謝梁公，夢寐心不忘。  
題何幼恭所藏方壺洪崖圖

洪崖蓄元氣，蒼然太古色。乾坤一砥柱，巨霸豈能擘。眾山非  
不高，蒙翳多荆棘。茲崖獨荒涼，乃有古仙蹟。偉哉方壺仙，善  
畫人莫識。揮毫奪神功，白晝天昏黑。

題婁仲實繼志齋

先人誨後人，後人繼先志。所遺非籛金，一經乃傳世。蕭然坐  
幽齋，外列叢桂。靜觀河洛圖，造化有深意。

哀詩錄寄富溪朱孝子且以自哀吾母云

我母久已沒，汝母亦不存。哀哉不有母，何由生我身。幼小俱  
失怙，喪亂家益貧。衣食仰慈母，教育乃成人。母沒身獨在，再  
見嗟無因。慈烏未返哺，哀鳴夜達晨。呼天杳不聞，痛恨何由  
伸。母德實深厚，至哉比坤元。報答恐無地，揚立當顯親。曾參  
有明訓，與子書諸紳。

題王自問守拙齋

自問四子命名曰可  
漁可樵可耕可牧

堪輿何茫、萬彙生其中鴻荒世已遠淳元變澆風智巧日以滋古道誰能崇猗與谷中叟讀書且明農衣不尚紉綺門惟掩蒿蓬漁樵與耕牧四子各已供此心常自閑衆欲鮮能攻從人笑懶拙巧者勞其躬覺衰自遣生世誰不老既老何必悲但恨減情思未成千首詩前瞻愧蘓李後企師陶韋吐詞無詮次醉裏聊書之君聽樵人笛信口雲中吹

幽居

山中有流水隴上多白雲二物本無盡幽居誰謂貧朝耕在雲裏夕釣臨水濱此外復何樂讀書師古人

蓮

幽花何亭亭、性潔出漣漪其香遠逾清褻玩非所宜物有君

子搵人豈不如之彼哉譽昌宗我獨思滙溪

豐年

幽風世已遠王業今復隆豈敢辭艱難務本當力農維時降甘雨我稼已茂、一稔定可期未私乃先公、家畢租稅祭祀亦已共飲酒日為樂不知年歲終

鄧伯言玉筍集卷之二

歌行

送范知縣美解赴京分題得九仙臺

玉山根盤數百里，上有高臺半空起。地闢天開玉削成，今來古往神居止。亭、萬仞撐晴空，旭日照耀金芙蓉。層崖疊嶂鎮晴霧，紫蘿碧草搖春風。九仙去，一千載不在。緱山定瀛海，月明環珮每歸來。臺上遺蹤宛然在，使君閒暇寄登臨。歷覽遺蹤慨古今，指點羣峯三十六。石崖飛瀑能清心，蒼涼落日歸林鶴。臺上霞光爛相燦，儵然遊罷去朝天。何日燒丹尋舊約。

題陶用大淵明歸去來辭圖

用大名洪泗州虹縣人鎮襄陽授武節將軍

田園荒蕪亦已久，彭澤何須求五斗。徘徊三徑撫孤松，悵望間雲數歸鳥。聞孫為國勵精忠，出處雖殊氣味同。却憶柴桑

遊未得祇看圖畫<sup>畫</sup>仰高風

題謝知縣東山讀書圖

幽人示我東山圖耳邊如聞猿鶴呼雲生寒巖翠縹緲樹夾  
流水青扶疎中有山房絕瀟灑苔蘚侵堦藤覆瓦角中隱几  
是何人謝氏賢良讀書者

題丁御史五老履端圖

正月二日天氣和東風忽爾來相過汀洲草堂集五老春酒  
介壽歡如何吁嗟行藏信所遇白頭猶向山中住不是當年  
遇繡衣畫圖那得留清譽

題李如愚環山亭

大行之陽有盤谷玉筍十里來環山、人高風從李愿作亭  
正在山之間兩山盤迴宅幽阻一澗泓澄石可數居人比屋  
樂漁樵令族前朝列珪組當今天子開治平胡為不出留斯

亭、中佳景自可樂秋桂弄影春蘭馨長松亭、間脩竹上  
有鷓鴣下麋鹿興來掃石坐清風自拂瑤琴彈一曲琴彈一  
曲酒一壺醉後擊節歌鳴、不須更問千鍾祿此樂人間還  
有無

題胡伯輝問月軒

天風浩蕩浮雲開人間颯爽無炎埃捲簾呼酒待明月玉盤  
飛上東山來頃刻大地俱皎潔疑是千山萬山雪何處飛仙  
跨鶴來一轂鏤笛蒼崖裂君家本是故侯家問月何須起嘆  
嗟試躡雲梯天上去廣寒丹桂正開花

題李如愚太白把酒問月圖

把酒問明月今古悠、幾圓缺月輪雖缺有時圓人似浮漚  
還易滅團、桂樹搖天風瓊樓劇飲歌吹濛舉杯邀月、在  
手何用捉月波濤中我願生年一千歲與子同醒復同醉不

須步月向蟾宮尋玉峯頭共游戲

和錙俊欽將進酒

蒲萄酒鸚鵡杯舉杯縱賞茶藤開翠裾紅袖緩歌舞戲蝶游  
蜂紛往來人生及時且為樂莫待花殘春寂寞賓朋滿座酒  
滿缸花前袖惹春風香少年此樂殊未央祇恐西鬢成秋霜  
願招松喬與對飲乞取海上長生方

和錙俊欽華表鶴

遼東城上風淒淒華表柱頭秋月輝千年白鶴作人語至今  
聞者為傷悲傷悲復傷悲今古悠、無盡時何當服食生羽  
翼還從海上尋安期

題羅宗瑞法師禱雨感應卷

南州大旱禾黍枯赤日照地如紅爐老龍臥穩鞭不動無乃  
上帝封江湖道人早歲曾學道能以精誠事祈禱綠章奏罷

起風雷三日為霖救枯槁吁嗟妙道不可言安得共究元中

元君不聞武當昔有張洞淵道成擲筆還升天

洞淵成道之日作頌曰行

年八十一幻緣今已出擲筆歸去來大虛無蹤蹟

銅雀硯為謝檢校叔履賦

鄴中廢瓦荆榛裏對鴛央飛不起千年雨露飽涵濡蘊蓄  
元精呵出水君家瓦硯古更奇龍尾風味真堪齊昔年蓋覆  
貯歌舞此日研磨助發揮嗚呼粉黛成塵土惟有文章照千  
古摩挲此硯為題詩漢魏興亡俱可悲

未央瓦硯為徐縣丞伯澄賦

未央廢後成荒草片瓦拾來如拾寶清池磨洗劫灰餘作硯  
寧輸銅雀好方平潤澤如錢堅窻間試墨生雲煙大明功業  
可紀述西漢文章宜校編吾知徐君實好古却憶鄴侯心獨  
苦嗚呼漢家宮闕四百年此瓦作硯人猶憐

豹枕為羅孟載賦

古今才名孰可數人言羅鄴詩中虎異哉石枕虎豹形枕虎  
哦詩魂不驚珊瑚琥珀未為寶此物辟邪人見好向來借我  
枕向巖松巢黃斑逐隊敲吃哮

送醫士李文中歸永豐

葛仙去幾百年尚留丹井陽山前丹氣夜燭東南天不知  
妙道何人傳李君好仙仍好學到處題詩兼賣藥只今歸隱  
白雲深服食金丹養黃鶴

競渡歌

石榴花開燕新乳蒲風拂面收殘雨江頭競渡鼓轟雷千載  
遺風續荆楚嗟哉三閭賢大夫汨羅自溺胡為乎懷王信讒  
薄忠義清濟豈肯同汚渠寧甘一死奠魚腹萬古湘潭深且  
綠至今競渡起歌聲聽者如歌還似哭諠呼兩岸敲沸天不

知勝負誰家船錦標奪得唱邪許盡說兒郎年勝年

清夜對月

萬古一輪月清光照九州長生白兔搗藥不能醫此萬斛  
之窮愁人生百年世希有去歲紅顏今白首憑誰喚起謫仙  
人乘月高歌對樽酒對樽酒發長歎月中桂樹不可攀功名  
富貴我何有詩卷長留天地間

中秋陪諸公筵集

去年曾赴滄洲期中秋對月哦新詩今年此夕月仍好却恨  
去年人易老美人置酒開我愁酒酣起舞仍歌謳歌敲激烈  
振林木桂香冉風蕭月中白兔搗藥藥月殿霓裳奏仙  
樂人間天上際佳期笑把金杯恣謹謹恣謹謹情悠古往  
今來春復秋中天明月願長滿四海諸公常共遊

讀姚子深寄婁良器詩因述古作者之意次韻

淵明家住潯陽口籬下黃花門外柳素琴挂壁本無絃祿米  
何心求五斗五言家法信有傳日對青山題數聯平生所樂  
在杯酒百畝春風耕秫田坡翁學陶得三尺古澹中含溫潤  
色昔年遷謫到羅浮一日詩名播南國陶蘊已矣遺高風皎  
若寒蟾行大空當時三老自曠達胸襟浩蕩春波融後來虞  
范金閨客海內文章乃為伯崑崙太華兩相高鷹卓飄、勢  
無敵彼猶千鍾我一觚奴僕命我送奔呼作詩固是性所好  
陶蘇虞范難為徒姚若英才最超越思入高唐更飄忽烏絲  
闌上寫春雲白玉杯中吸秋月別來去日急如飛澤雁隨陽  
梁燕歸人生乖隔每如此寧不拊髀長歎歎七山南去二十  
里不識興居近何似因廢妙句論古人更寫幽懷寄雙鯉

久旱用廖南溟韻

我有雙劍恨不斬紅蜺紅蜺日、天東橫隔斷山東雨暗山

西晴良田六月塵埃生官家租稅之供給胥吏打門朝莫殺  
安得封書奏明主下詔即免今年租徵君不聞府帖昨夜來點  
兵漢官政化今及更令民賣牛買劍東南征傷哉大旱政如  
此何不蠲租罷戰紓民情為邦乃以民為本、固未必邦家  
傾嗚呼本固未必邦家傾安民不戰四海平

芙蓉花邊燕客歌

朝見芙蓉開莫見芙蓉老韶光似箭不少留鏡裏朱顏豈長  
好主人留客多歡情玉壺置酒花前傾群公掉頭不肯飲何  
如莫向花邊行尊中有酒能盡醉花上向人取歡意酒闌斫  
劍歌莫哀明年花發應重來

奉簡羅淵泉

字民覽吉水人  
澗谷先生送孫

豫章先生八十餘有才不仕山林居黃塵黑霧暗滄海白髮  
青燈看古書古書喪亂今餘幾六籍瀾翻口能記喜尋玉筍

雲松巢懶謁金臺朱紫貴  
帳前弟子列兩行  
絃歌事業相頡頏  
頑先生冠帶坐終日  
嬉笑怒罵皆文章  
有時吟詠長松下  
珠玉聯篇妙無價  
蘭若翡翠凌絃詞  
高義正闕風化蹇  
予廢學今有年  
喜來侍坐春風前  
沛然議論何所似  
倒挽銀河傾九天  
梁顛科名今已矣  
方干雲臥終能比  
老懷浩蕩誰得知  
我作長歌未已  
玉山高  
春雨蘿淦江哀  
明月波水流不盡  
山不老  
送此無如才思何

松聲為張仲倫賦

淦水東南望松壑  
秀色龍蔥氣磅礴  
千株雪壓龍虎爭  
萬竅風生筍籟作團  
白石春泉香中有一士  
身昂藏問之不咲  
亦不語  
羊裘草履漁竿長  
松間貯酒三百斛  
醉采松花看麋鹿  
雨裏桑麻十畝園  
煙中蘿薜三間屋  
浩嘆風塵今幾春  
漁樵為伴松為隣  
明年我上泛樓息  
松下憑君作主人

過彭蠡湖

天風送我揚州還  
挂席長歌彭蠡間  
鯨魚飛出白浪起  
恍惚搖動匡廬山  
匡廬九疊雲霄上  
平湖直與爭雄壯  
夜月龍吟百丈淵  
秋風雁落黃蘆港  
天開地闢元氣通  
萬頃鏡面涵冲融  
東船西舫棹歌發  
北客南人萍水逢  
參差萬箇湖邊柳  
有人家賣魚酒  
舟子乘風不肯留  
船頭兀坐空回首  
船頭回首心愴然  
人生幾得泛湖船  
却思大禹勤疏鑿  
功業留傳億萬年

王節婦詩

王氏之子年及笄  
嫁作進士梁君妻  
梧桐月冷鳳皇宿  
芙蓉露白鴛鴦飛  
當年舉案期偕老  
豈意風塵不相保  
投井寧甘死  
少年辱身那肯送  
羣盜高壘凜  
冰雪寒激烈  
壯士推心肝  
君不見竇家兩女墜  
崖谷至今聞者為辛酸



鄒君伯謙南昌士族也挾筆墨來遊金川謁諸文士  
余觀其氣宇不凡而有志于學告别省歸詩以贈之  
鄒君南昌人來作金川客白面紅顏弱冠時瑤林瓊樹同標  
格曠懷喜結江海交掉頭不肯居衡茅五湖吟嘯弄明月胡  
為訪我雲松巢囊中出彩毫匣中取元玉把卷臨清流索我  
賦別曲愛君情似江水長留君不住空傍徨狂風萬里送歸  
雁落木蕭蕭鳴夕陽知君辭親去已久雲白西山幾回首明  
年有約到南昌鏡柱觀前共沽酒

題高崇節地理卷

高君行年六十餘壯心猶似千里駒平生蹤跡半天下手持  
九卷青囊書青囊之書世沒有妙理何人熟參究高君讀誦  
口瀾翻要總景純千載後君不見黃河萬里天上来崑崙太  
華俱崔嵬乾坤定位聖人出金陵王氣何佳哉請君直上金

陵去竟叩天關與天語龍蟠萬古帝王州四海蒼生望霖雨

恒德堂為鄒母廖氏賦

二子伯瑜仲瑋俱有孝行

小年曾讀共姜自誓篇使我敬之神凜然只今廖氏有恒德  
姓名千載同流傳廖氏本是良家子二十幾居忍同死翁姑  
白髮子方孩自采蘋繁供祭祀白日皎、天蒼、此心百鍊  
堅如鋼當年自誓靡他適堂前終養仍終喪容顏漸老子成  
立更築高堂面青壁歲寒何物耐風霜翠柏崔嵬二千尺

館市巡檢鎔時中攝新淦縣事有政教於其還鎮詩  
以美之

將軍英妙年神采照白玉紫禁曾依日月光青雲蚤展驂騑  
足翠屏西下淦水東驛路迢、當要衝我皇開國慎防禦子  
復領鎮持弓到官泛容僅一載鼓角樓新民俗改夜月山中  
虎豹藏春風陌上桑麻藹居民外戶夜不扃行旅往來能送

迎三鄉父老服政令五歲兒童知姓名前年金川之牧守點  
行悍卒喧騰久城裏居民日夜愁妻子難全况雞狗將軍政  
績大府聞領符攝職仍施恩首同諸將嚴法律商賈坐肆軍  
轅門偉哉將軍人莫比文武才兼心似水政成弊革強梗摧  
鍊鞭躍馬城南回攀轅臥轍留不得夾道松風起寒色翠屏  
萬仞高嶺屹上有百尺青琅玕歸囊得詩凡幾首把詩坐對  
屏山看

題丁子堅所藏張彥道畫唐官進馬圖

時二公皆以御史歸田

張君上疏歸來早畫筆猶為當世寶向來得意寫龍媒雲霧  
晦冥雷電掃青絲絡御者誰却憶唐官初進時萬里來泛  
沙漠道九衢翻動雪霜蹄當時天子惜良馬六命韓生作圖  
畫只今閑却兩青駝春草春風在原野

題楊妃出浴圖

春光澹、春風起百轉黃鸝宮樹裏宮中妃子繡羅衣晴來  
出浴溫泉水溫泉之水清且漣凝脂洗盡爭春妍初疑滄海  
浴明月又如玉井開紅蓮君王一見生歡喜六宮粉黛誰能  
比一曲霓裳樂未終胡塵已暗三千里天生九物凌爾為馬  
冤竟死誰能悲丹青一幅半零落千載君王當鑑之

鄧伯言玉筍集卷之三

五言律詩

寄周主事文瞻二首

天上辭榮日月中養道年間將玉筍篆寫出白雲篇夜月蒲  
萄酒秋風擺極田知君有真樂那得共盤旋  
寂寞山房裏思君未識君空瞻一片月還隔幾重雲伐木鶯  
求友巢松鶴不羣物情與人事感嘆不堪聞

送知縣曹哲德明美解赴京

家住燕山北官居紫滄潯三年惟飲水永日祇彈琴政體吾  
皇意天知令尹心行看書上考入覲五雲深

題謝氏蘭玉堂

瓊樹三山種幽蘭九畹香移裁宜勝地列映近高堂自可叙  
仙佩真可比玉即因之懷謝傅幾葉尚留芬

角巾存古制何必華陽求一幅勞相贈千金未足醉花間堪  
源酒松下免科頭迥覺添蕭散逢迎遠俗流

謝子晟惠藤杖

嶺表歸來日枯藤得幾枝情深煩遣贈老去賴扶持正直能  
同操勻圓頗中規終當乘暇日拄到謝家池

憶上海令黃子津

獨坐看新月長吟憶故人婵娟同此夜離別又經春白髮催  
人老青山入夢頻無由一相見顧影倍傷神

客館辭歸

鍊冠兼卉服老去樂清貧流水琴中趣閒雲物外身竹房留  
客慣花筵弄孫頻自有幽栖處謔罵頗厭人

題李氏盤谷

幽居似盤谷流水繞柴門意適觀魚鳥年深長子孫耕耘聊  
自給理亂未嘗聞何日操藜杖送君遠世紛

題張行之竹間亭

偶逢溪上友因造竹間亭路徑通幽寂煙雲入杳冥坐來清  
客思題處有僧名竄喜安巢鳳朝、刷錦翎

挽黃玉潤

未見還堪恨云亡恨更多麟經藏篋笥馬鬣葬山坡無復蒲  
輪召空聞薤露歌高風不可仰吾道竟如何

題西門巡檢瞻雲堂

大行人

天際秋雲起官居思不任寧同宏景翹還有狄公心渺、千  
重白微、萬里陰因之憶親舍遠在大行溪

送謝子厚隨父之武昌

落日千山路長風萬里舟親朋憐遠別父子樂同遊白浪過

彭蠡蒼煙望鄂州非晚覽奇勝定省足消憂

題龍伯原桃源小飲

草屋孤村迴桃花一水深不同潘岳趣還有武陵心漁父應相問仙家或可尋年、愛春色把酒對芳林

白石硯

一片大古雪窻間猶未融堅凝端石比瑩徹水精同頗怪胚胎異堪誇制作工研磨經幾世揮洒對清風

冰壺為宋一俊賦

表裏俱澄徹光涵一室中潭疑廣寒月落在水晶宮冷沁神仙骨形全造化功平生愛蕭爽擬入訪壺公

題朱學淵石室山房

石室炎天冷雲窓白晝昏仙人常對奕詩客屢過門簷外松千尺琴邊酒一尊陶然忘世慮不似屬乾坤

莫春同友人觀江漲

江樹雨瀟、江波斷板橋望洋心若失泛艇興偏饒且共漁竿樂須逃府檄招白鷗知客意並戲上飄

清明日掃先墳

已過寒食節况值落花天對雨情無限思親淚泣然邛壚迷草莽天地慘風煙有鳥來何處哀鳴向我前

客中春望有懷永平毛教諭宏濟西安何大使維翰

青山長不改白髮日偏多客思迷芳草年華逐逝波舊交成契濶往事六蹉蛇西北關山遠相思奈若何

悼亡

早歲期偕老中年慨獨存憑棺惟洒淚剪紙莫招魂令德宜家室深恩及子孫終當求密石為爾表高墳

寄何幼恭

時余失內助幼恭年將五十生子甫一周而失之俱可憫也

我有悼亡戚君懷無後憂莫年那見此老淚不能收世事恍  
如夢江波空自流吟詩聊自遣寄贈若為酌

題曾氏松閣白雲

白雲何處宿旦晚曉松閣變化能為雨氤氳雲在山濕添枝  
葉重晴鎖戶庭閒未可自怡悅送今願往還

題周宗祥綠陰清晝堂

手種堂前樹經年長綠陰午風眠處冷晝日坐來深喜得山  
林趣能知雅頌音何當分半席蕭蕭散塵襟

送徐御史服闋之京

海內賢良士人間孝義兒哀麻初脫後綸綍再徵時路去金  
陵遠帆開葛水遲應攀墳上柏洒淚告行期

題淵明畫像

淵明非嗜酒寓意酒杯中大化觀天地閒情對菊松風流千

載上感慨幾人同稽首瞻遺像雲開見華嵩

題張孟憲綠陰棋墅

林園新雨後棋墅夏涼初嘉木蔭窻戶青山成畫圖棧心元  
不競世事本來疎未問橘中叟斯人仙者徒

題鄒恒吾滄洲漁隱

結屋住滄洲開軒瞰碧流鳥啼煙樹晚風起荻花秋秫酒還  
堪醉鱸魚上易求陶然忘世慮天地一虛舟

挽成之錙進士

歲月窮經傳名教重甲科莫年遭喪亂吾道竟蹉跎正喜歲  
修好其如老病何貽文嗟絕筆痛哭望松蘿

挽何同德

一代衣冠士平生鍊石心有才乘世用多難祇愁吟歲月容  
華老風霜肺病侵不堪埋玉樹痛哭淚沾襟

晏起

老夫常晏起飯後始梳頭懶慢使人笑清閒得自由美蔬聊當肉大布可為裘鄰叟時相問農談酒數甌

題錢氏石田書隱

石田春水滿林館白雲多舊業惟耕學閒情托詠歌地偏宜竹樹檐迴帶藤蘿二有藏修意何當共琢磨

題王煉師雲巢

石洞還堪隱松雲亦可巢九真勞夢想五老託神交混沌含元氣氤氳濕翠梢醉眠惟伴鶴羣翼任啾啁

送伯良姚君之廣西金城寨巡檢

聖主求賢日將軍領命時金城煩警邏鎖馬正驅馳日月昭王化弓刀示武威瘴煙看掃盡嶺表悉平夷

挽丁御史子堅

仕為文章顯名因政事香泮芹新雨露臺閣舊風霜往事空流水荒阡幾夕陽遙知千載後潛德有輝光

何彥徽從軍遼東其父往問因寄

令子三年成嚴君萬里行艱難俱可念相見若為情遼海悲聞鶴天河願洗兵尺書將遠意歸馬看升平

山中見梅有懷吟梅老人何幼恭

白髮堪憐我負姿喜見梅倚闌成獨咲帶雪為誰開天地含元氣山林產異材遙知東閣裏吟賞興悠哉

題陳氏學堂山房

宦族宗秦國山居扁學堂古今留翰墨州木有輝光倚劍丹霄近看書白日長何當借雲榻共話到羲皇

重題

地為人增重山因學著名舊藏書籍在新築州堂成捲幔通

雲氣鳴琴襟澗殺知君事游息養素薄時榮

過孤山峽

窈窕孤山峽潺湲一澗泉望中如削玉聽處似鳴絃路轉疑  
逢虎峯高欲近天恍然得平曠林木數家煙

憶母

獨夜滄洲月清光照膽寒倚闌情脉脉憶母望漫漫感慨成  
千古憂思集萬端那堪聽鳥鳥啼到五更殘

寄鄒貢士仲律

故人久不見消息始相聞未說文章進深知行義敦讀書忘  
歲月為客信乾坤頭白嗟何補期君共討論

奉和李如愚見寄

老鶴千年壽間雲一片心乾坤今古事風月短長吟官族西  
平遠仙家玉笥深何當騎白鹿閒暇一相尋

寄贈醫士錫東推

方書傳幾世丹鼎有神功身在壺天裡民躋壽域中杏林藏  
穴虎寶匣臥雙龍欲問長生藥螺山隔幾峰

客中有懷何大鏞朱學淵

去歲重陽日曾同醉菊花別來無雁信望斷惜春華風雨江  
亭莫雲山客路賒思君才入夢厭殺亂啼鴉

客中寄文彬

細雨清明近幽坐白日長懷君當此際為客在他鄉有恨花  
隨水多情鬢易霜遙知故園竹新笋過隣墻

寄臨江道紀王默淵

聖代興元教真人領篆章道書藏玉笥官舍倚清江已羨承  
恩澤終能肅紀綱驚看斬邪劍每夜吐光芒

題文子才括蒼吏隱卷



我遊羣玉洞君寓括蒼山出處雖殊調心神本共閒者蒲居  
石室收印入松閑豈被浮名縛悠然天地間

題百華寺

慈山白雲裏古寺覺城東  
迤濕莓苔雨窓寒薜荔風  
傳經由慧遠洗硯憶陶公  
暫借禪床坐心澄萬慮空

古文羅允瞻作時思堂以祀先而又閔其婦翁蕭君  
彛翁死義而無後乃附祭于堂

蕭君死節義羅氏重彛倫禮謹春秋祀恩隆內外親  
九京寧有憾兩姓幸相因千載斯堂在聞風亦愴神

寄錫進士伯琛

舊交多寂寞高士近何如  
白首窮經傳青山繞屋廬  
種松招海鶴倚檻愛池魚  
養素無榮辱心存太古初  
伊昔曾相見論詩一解顏  
別來經歲月望斷隔雲山  
撫事偏多感逃名且自閒  
葛峰多勝蹟那得共躋攀

東邱行素

久別邱行素重逢髮半蒼  
世情無係累文物有輝光  
歲月宜琴酒乾坤任海桑  
相知幾人在萬感集中腸

風雨訪錫孔殷不遇

瀟瀟溪上雨淅淅樹間風  
擬訪天台客難追葛水蹤  
尺書鴻雁遠樽酒父兄同  
飲罷題訪去重來意頗濃

宜咏樓

危樓供遠眺鬢髮在黃州  
翠合羣山晚涼生萬竹秋  
古今懷勝蹟天地汎虛舟  
此興宜高詠浮名不用求

遊郁水

郁水多前輩重遊累作期  
峽寒霜落早澗曲水行遲  
葯擬分瑤草書仍訪墨池  
平生耽野趣一到一題詩

寄吳六舅從吾先生  
儒名推令族吾舅冠羣倫但倚文為富休論病是貧  
菴苔深  
巷雨花木故園春近想多新作猶煩遠寄頻

外舅襄陽遠音書恨未通  
關河奔走外鄉國亂離中  
暗草江南路晴雲塞北鴻  
一尊林下酒談笑幾時同

枕上作

夢斷五更時山家雞亂啼  
風生梧樹裏月過帝窓西  
為客心牢落傷時氣慘悽  
遙憐征戰地萬骨委塵泥

贈別席煥章

風流席子雲游藝最超  
群卷裏新詩句毫端小篆文  
折梅曾寄我看竹又逢君  
獨有憐才意臨歧不忍分

次玉筍羅提點竹間韻

聞師臥竹陰故我竹間尋  
嵇阮平生翹求羊太古心  
月明看鳳宿風起聽龍吟  
想得題詩處毫端翠色侵

寄姚觀海

白髮感秋風淒涼世事空  
昔交騎馬客今伴釣魚翁  
歲月閒吟裏風塵醉眼中  
可憐同里閑只是各西東

題陳漢仁雪舫

幽人住城市小屋似扁舟  
素壁光含雪銀床冷浸秋  
乘風暮瑤島釣月憶滄洲  
同郡多名士相過聽棹謳

鑿井

移家修竹裏鑿井屋西偏  
未盡兩日力能通三尺泉  
味甘同玉液色湛見青天  
頗快慈親飲容顏勝去年

贈滿公太虛

杖錫遊方外詩名滿世間  
相同明月好心似白雲間  
香霧天

龍繞松風海鶴還知師容入社堂上有慈顏  
白雲間香露六  
七夕留屏山館中

去歲山中客曾為七夕吟感時懷往昔守拙到如今生計田  
園薄羈愁歲月深不知牛女會還識此時心  
題永豐令蔡行素樸實齋

百里安民俗陶然太古風布衣三長物茆屋有佳桐未覺羲  
農遠真堪卓魯行何須種桃李桑柘滿城東  
哭兄伯讓生至治丙寅以甲午歲飢困商遇寇害

重利輕生死哀哉負所天青山空有恨白骨寐無言思聽慈  
親哭誰為弱弟憐幾回風雨夜歌枕淚潺湲  
鄒幼亨以召赴京告歸養親因寄二首

之子文章進嚴君德望尊家傳東魯派人說道鄉孫承詔曾  
飛動辭歸得清溫聖朝思孝治風俗喜彌敦  
水驛曾追送天門又賜歸布衣霑雨露綠服拜庭闈生計思  
田里風光說帝畿解裝三長物滿卷燦珠璣

幼亨為錄玉筍集  
習隱猶南郭知音似子期不閑塵世事為錄老夫詩竹映當  
窓几雲生洗墨池遙憐揮洒處竟日不知疲

秋夜憶陳尚泰  
白髮山中叟清秋卷裏詩五言推古淡數月惜分離雁過西  
風急烏啼北斗低懷君當此夜愁絕倚窓扉

暇日閱謝檢校叔賓詩集  
北極開薇省東山築草堂斯人兼吏隱盛代有輝光用法元  
師漢吟詩更擬唐深慚策駕駘猶欲並騰驤

東江泳思  
賣為同康伯吟詩學少陵驚看寫珠玉那得備參苓歲月吾

衰老山林子俊英何當種梧樹早聽鳳凰鳴  
題鄒文彥冰思堂

兵戈有寧日父母云歸時黯、塞雲近蕭、風木悲江流千  
古恨堂樹永思碑亦有先親念詩成不忍題  
客歸與舍弟仲言從弟季言宴集

昔別憐桑梓今還撫菊松入門兒女咲展席弟兄同歲月全  
生計衣冠尚古風怡、有真樂往事愧飄蓬  
寄吳孔文

寒風吹野樹白雁起汀沙渺、長江去曛、落日斜半生同  
作客兩地各思家歲晏吳溪上梅開幾樹花

明月照江閣北風吹樹林數聲何處雁兩地故鄉心夢裏頻  
相見愁來自不禁歸程須早計莫待歲華侵  
寄吳嘉靖

追悼先友曾吾忠

憶我年方壯多君學已明往還論古道生死見交情夜月書  
窻白春風墓草青不堪揮老淚况復聽猿聲

答錫修已

獨對山中月秋風正颯然未為攀桂客空學者蒲仙鬢髮千  
絲亂琴書四壁懸故人憐寂寞詩寄白雲邊

次蕭編脩用濟韻

新詩煩故友遠寄自城中豈意龍門客能思鶴髮翁別離座  
世著作古人同不有知音士誰憐爨下桐

寄九仙觀道士陳子雍

虬髯披鶴氅道氣養丹田身外元之事山中別有天姓名仙  
籍注文字世人傳我有萑蒲鼎相期煮石泉

題秋林讀書處

江風寒葉落燈火夜窓虛潭上罷漁釣林中聞讀書沈潛知道味蕭爽得幽居易爾抱貞獨榮名何足趨

挽陳長史

二首

蚤歲攻文籍中年樂官遊儒林有根柢王府贊謀猷山擁秦城壯雲連玉笥幽功成身已退底事致愆尤  
一死人皆有嗟君獨可哀金陵歸白骨玉笥失英才猿嘯悲風急山空古木摧相過一洒泪明月照蒼苔

題梁園雲景扇面

梁園風景異興逐雪花飛瑤館東西戶瑤林千萬枝望中迷舞鶴賞處艷歌辭枚馬今何在風流見畫師

老去

老去惟踈懶閒來復嘯歌倚樓孤月上隱几好山多野飯甘藜藿秋衣製芟荷不堪腰帶減長是病詩魔

寄何井敬兄弟

一別逾三月相思復幾回山林多勝事伯仲搃英才舊集題華鄂新居闢草萊遙知風月夜綵侍進霞杯

兵後訪西鄉宗族

西鄉喪亂汝宗族家存帛古寧無恨分流本共源紫苔荒舊業喬木尚清門大傳留祠廟高風百世論

贈相地黃一初

老子雙蓬鬢長年醉復醒光陰隨鏡杖風雨護龍經水接江淮白山連華嶽青牛眠何處是為我作圖形

五老慶春圖為子堅題

玉笋傳枰酌新年喜氣多東風如有約五老適相過列座衣冠舊相看鬢髮皤主賓情爛熳談笑眎庭柯

別醫士彭碧清

我愛彭居士蒼顏復古心醫名著江海隱興在山林放鶴雲  
霄遠燒丹歲月深相逢忍相別把臂欲霑襟

王筆新醫士李魚善歐鄉人持其祖嵩可所編運氣書一卷  
乃吳文正公澄為之序引以示余嘉之因題四韻

於其後

終事醫術李氏獨專門學究內經秘心知萬化原著書忘  
歲月種杏滿林園拉卷懷先哲題詩付後昆

寄醫士李性善

白首攻醫業青山養道心為爐猶伏火杏樹已成林歲月仙  
家永塵氛世慮深欲過龍虎峽相即坐松陰

美邑宰

公姓楊名仁字子山嘉興人廉勤自守政令  
嚴肅吏民稱神明不可欺有漢良吏之風

宰邑承恩命臨民有政敬戴星還

與水共登清道為朝

廷重心于富貴輕何當告太史卓魯可齊名

上判簿二首

公姓王字宗道  
通經術有仁政

金川勞簿領政及魯中年善教生民樂除奸鬼魅愁縣衙春  
暎草更鼓月當樓公退之餘事羣經自校讎

迂濶云生計傭書到白頭歲寒松柏友月俸稻梁謀出處由  
天命謳謌樂承宣當告別春色望龍樓

鄧伯言玉笥集卷之四

美新淦曹明府招

聖德如天極海涯縣公鳧鳥到荒遐金陵地接二千里紫淦  
春回十萬家紫牘庭中飛鳥雀弦歌城外種桑麻才名不獨  
傳京國庾嶺南來衆口誇

寄毛宏濟時寓玉笥山中

昔年為客厭風沙長嘯歸來鹿引車樓上一簾青嶂雨洞中  
千樹碧桃花攜琴每訪神仙宅納履曾辭富貴家可嘆別離  
經歲月寄書常是隔煙霞

菊花枕

采遍東籬一萬叢繡囊盛取枕秋風寒香正在頭顱上粉蝶  
還來夢寐中彭澤風流千載舊邯鄲富貴一時空讀書未老  
雙瞳暗得爾全勝服食功

鍾陵懷古

一教畫角城頭月吹破鍾陵萬戶秋南雁不知天地老西山  
猶帶古今愁滕王閣上驚塵入孺子臺前戰血流惟有神君  
留缺柱千秋萬歲鎮靈湫

大風詩次韻

陰壑霜飛應早冬又拈騷筆賦雄風山河只在寒聲裏草莽  
同歸殺氣中豎、塵沙飛白晝飄、鷹隼上晴空曾聞漢主  
歌豐邑猛士能成萬里功

清明

落花芳艸燕爭飛寒食清明客未歸山遠定勞慈母望地偏  
真與故交違十年書劍嗟何補二頃榛蕪悟昨非羈思不堪  
長繾綣幾回愁絕送斜暉

甲午歲飢民間采薇代粟

庚嶺多時劫火焚凶年黎庶食薇根青山曉斷雲垂擔白水  
宵澄月映盆老婦作成心獨苦嬌兒求飽手爭捫大官每日  
饜梁肉此味誰將與細論

東姚觀海

一村煙火接隣居來往清談也自娛願我只為文字苦看君  
不受利名驅松邊亂後成茅屋花外晴來置酒壺莫怪近年  
相見少隴頭時復帶經鋤

和艾子材有感

生不逢時奈若何六年喪亂飽經過聞雞自咲劉琨舞扣角  
誰憐甯戚歌華屋兵餘芳草合小園春盡落花多躬耕豈是  
男兒事勗尔明經赴後科

和龔先之陪定子靜宴臨清樓所作

小隊同遊趣不稀元戎應恨得君遲州肥沙上青驄馬日絢



城頭赤羽旗然酒臨風娛翠袖  
膽瓶和露插花枝幕中賓客  
如君少橫槊間能共賦詩

和張伯溫秋興三首

知君隱處白雲岑俗意都無在眼中  
樹底宴酣思臥石竹間  
棋罷欲乘風冥心會究天人學  
老筆能參造化功稍待塵清  
無戰伐袖書還謁帝王宮

并梧搖落露溥溥客子愁懷強自寬  
題柱昔如司馬壯賦詩  
今作孟郊寒 泛廢後榛蕪盛道至窮時  
出處難安得南州

早寧靜讀書耕稼足為歡

白雲深處掃莓苔坐嘯蒲團日幾回  
中野只聞豺虎鬥北庭  
那見鳳凰來將非李翹參油幕士  
仿陶潛托酒杯時世不同  
家業盡華門斜傍竹籬開

和陳積中見寄二首

華館春風綺席寬綠楊斜蔭石闌干  
鸞黃杜酒浮銀瓮雪白  
吳鹽出翠盤花外筍輿添散逸  
行間棋局樂平安主人好事  
能供給長缺由来不用彈  
麻鞋緊繫布袍寬世事紛紜  
搃不干泛菊每求陶令酒  
盛蔬  
擬借石生盤家貧最喜庭闈健  
主聖終期社稷安况有故人  
能慰藉取琴同坐竹邊開

壽陳敏學

聞道巖前九節蒲服之還可上蓬壺  
不勞更問安期訣政好  
閒觀老子圖長夏清風生檜柏  
老年紅日在桑榆有時讌客  
華堂上一炷沈煙裊鴨爐

呈族叔

雪洒梅窻酒共斟一時風致百年心  
杜陵亂後居芳州阮籍  
閒來訪竹林鏡裏不曾看白髮  
床頭休恨散黃金古來賢士

多貧賤留得姓名直到今

別陳積中

石橋山路雪霏、十里寒梅照客衣。宗慤漫懷投筆去，陳搏還喜束書歸。萬株松桂煙霞老，二頃田園雨露肥。想得故園今夜月，弟兄樽酒奉庭闈。

奉荅陳三選

先生寓隱南溪上，絕勝王維住輞川。裊、釣、坐、間、白、日、悠、々、簫、管、醉、涼、天。松、杉、午、蔭、門、前、路、鶯、鴨、秋、盈、雨、外、田、何、必、更、為、

干祿計詠懷時有白雲篇

犬吠雞鳴宅舍偏，武陵風物晉山川。玉堂金馬知何處，流水桃花別有天。李白豪雄偏愛酒，韓公老大欲求田。向來賴寄新珠玉，報荅終慚月露篇。

和何克敬春行

久別雲林學道人，不知何處復相親。數聲啼鳥千山雨，萬箇垂楊一市春。漁釣昔聞周隱士，謳吟今作漢遺民。南隣及見新題在，把卷臨風字、珍

題張行之所藏梅竹圖

一幅輕綃寫梅竹，參多清致在毫端。嶺南生意東風早，淇上繁陰六月寒。止渴擬求經雨實，釣魚曾斬拂雲竿。如今只恨無韋偃，添畫清松取次看。

奉和曾伯曼韻

廬陵學者皆名流，一士肄業韓堂秋。飛騰未得進士舉，模範獨與鄉人求。春風童冠樂吟咏，暮雨江山懷釣游。近日傳聞避豺虎，舉家寄食來吾州。

家舅和前韻示余因再用韻奉寄

南郊廟前溪流紫，蓋峰下梧桐秋片雲。相隔不可會，西屬

未聞何所求荒城厭見豺狼亂溪谷喜同麋鹿遊吾舅安居  
莫歎息杜陵多難留鄜州

贈相地宋以文

曾把青囊參妙處還今白骨感恩深山中幸有寬閒地世上  
誰無富貴心萬壑松風聞虎嘯五湖烟水聽龍吟登臨莫怪  
興亡事花落花開自古今

奉東曾進士得之

翠屏萬仞摩蒼穹下有志士才且雄讀書不厭一萬卷食祿  
猶待三千鍾大鵬低飛簸海水老鶴獨立鳴天風常時慣見  
車馬客開館坐對仙巖松

題南山西嶽行祠

山靈昔報能羅夢野服重登虎豹關萬里青雲渠有待九重  
恩命帝仍領縣崖疊嶂烟霞濕古木蒼藤雨露閒欲訪雲儲

修煉法珮殺疑向月中還

走馬燈

絳紗籠子夜通明戲馬盤迴不暫停漫想龍媒追電火恍疑  
熒惑犯房心星光騰不照關山路影動還依錦繡屏多少駕駘  
空食粟獨能焜耀使君庭

用韻答謝彥質

謝家池上又逢春坐見東山氣渾池淪千畝竹松宜獨隱一簾  
風月愛清貧鹿門自可携妻子宣室毋煩論鬼神舊業儘隨  
征戰盡底須愁嘆似盧綸

雪用家舅世吾先生韻時和者五六人

六花飛逐北來風白戰諸朋多論功岐路不分夷險處灞橋  
那得往來通光涵萬仞神仙窟凍合千尋海若宮欲采黃精  
迷處所短衣愁殺杜陵翁

文彬借前韻見示用隱居之興答之

布衣長日坐松風肥遯漸無濟世功海上欲尋蓬島去花間  
疑與武陵通煙霞碧嶂羣仙府風雨蒼苔一畝宮多謝吾宗  
頻頌問馮生今學采芝翁

迎董棋墅為張仲倫賦

五畝田廬一澗雲紙屏楸局坐南董子轍頻向花陰落爽氣  
還從樹底分王質看回人寂寂有虞歌後世終君侯不是  
無心者夜雨燈窗復綴文

送艾錄事赴召

元暉

玉筍山中采藥苗金陵臺上有書招夷齊守義慚周粟賈董  
懷才入漢朝雁背冷雲天漠漠馬頭荒州路迢迢不知鳳去  
曾回否洗耳高臺聽九韶

次韻答陳學之

經年不見陳公子臨眺湖山樂未休海鶴晝歸雲表樹岸花  
晴照水邊樓文章自許唐人並曠達須從晉代求多謝向來  
詩句好月明思泛剡川舟

送蕭子雅往新喻省墳墓

渝川一水淨如練百丈諸峯高挿天喬木半存兵火後白雲  
多傍塞鴻邊君從此處尋先隴我寄哀吟弔昔賢千古文章  
惟老范石麟埋沒草芊芊

和周德川春夜聽雨

山雨瀟瀟雞亂鳴竹林風起薄寒生斜霑筆架應千點暗滴  
苔階正五更樹尾殘花泛擺落隴頭嘉穀自生成只憐未罷  
東吳戰遍野屍骸不可耕

題梁徵君石門精舍

白雲長鎖石門山翠壁丹崖不可攀千載清風在喬木九秋

清露汎崇蘭衣冠自可同園綺道德猶思述孔顏莫怪韜光  
老岳谷幾多膏馥在人間

壽吳六舅從吾先生

扁所居曰  
老吟堂

羣玉山連白石莊南箕星照老吟堂盤分碧藕期千歲律中  
黃鍾復一陽天地已知吾道長雪霜應任鬢毛蒼因公却憶  
磻溪叟八十猶能事釣璜

寄建陽司訓陳允章二首

江亭駐馬曾相別一去甌閩歲月深天上豈無桂攀手海頭  
還有釣鰲心典謨擬替唐虞治翰墨尤工鮑庾吟上有近題  
三百首煩君傳作治時音

玉笥峯前是我家數間茆屋白雲遮臨池洗硯魚吞墨入洞  
尋真庶引車萬事無心漫白首長生有訣服丹砂期君早上  
朝元閣莫學青門老種瓜

送劉進士允泰赴召

故家文獻春秋學亂後還山臥白雲聖代忽聞徵賈誼才名  
終不負劉蕢六朝帝業山河在萬里天衢雨露分為語鳳皇  
臺上客幾人漁釣楚江濱

楮衾用貫酸齋蘆花被韻

楮衾如雪絕纖塵穩臥還須藉布茵一片白雲松下榻五更  
明月夢中身惟應紙帳堪同調祇恐梅花亦咲貧羸得素風  
含混沌夜寒一晌便回春

山中答友人

曉晴空翠濕衣衫畫靜煙霏接洞巖茅屋有詩題歲月桃源  
三路隔仙凡間看碧柳常開戶喜斲黃精獨荷鏡多謝故人  
頻問訊駕駘今幸脫羈銜

別陳自得

四年來往槎溪路踏破溪邊幾片雲歲晏可憐猶是客情淡  
那忍即辭君故園梅蕊還相憶後夜猿聲不可聞我正黑頭  
君未老一尊他日更論文

廬陵

寺僧玉鑑之母因亂流離不知所在玉鑑

思念不已語及輒流涕乃白佛願長齋十年賣葯以  
資道里之費求母所在越數月遽得母書而奔走奉  
迎以歸甘旨無不具嗚呼豈非墨名儒行至孝而感  
鬼神也哉廬陵之能文者叙其事余上喜而作詩于  
其後

多年不見親每聞烏鳥動酸辛佳音忽爾傳鄉邑至孝  
由來感鬼神塵外緇衣惟白業人間綵服適青春知師賣葯  
營甘旨黃蘗何堪更比倫

寄錙季恭

何君崑上涼如水曾與彈琴坐石床夜久松風吹鬢髮月高  
花露濕衣裳別來每記當時樂老去終非少日狂何日重尋  
舊遊處洞仙頻約醉壺觴

毛教諭宏齋見過自云薦賢多矣然為國而非為私  
也予深美之賦此為贈

參人名在薦剡中黼黻斯文大有功玉遇卞和應價長馬逢  
伯樂始羣空門前桃李多時滿天下車書此日同頌我云才  
兼母病不辭茅屋聽秋風

和曾叔子山居韻

盛時樓閣倚岩堯亂後幽棲興轉饒晴日<sup>捲</sup>花簾花照地晚涼  
吹管鶴冲霄擬尋黃綺居商嶺懶學嚴徐入漢朝明日登臨  
向何處看棋應逐洞中樵  
廖山立自號梅樵賦此為贈

雁叫西風海國秋  
乘桴萬里興修  
宣尼已去同誰往  
徐市應能共子遊  
羨向夢中尋閬苑  
更於何處辨瀛洲  
天邊明月清如許  
不載紅塵一點愁

客中有感呈丁御史  
百花時節雨踈  
未得還家訓附符  
常恐白頭虛歲月  
且將黃卷理蟲魚  
長吟慷慨思歸日  
舊業蕭條戰伐餘  
却羨故人丁御史  
題橋不愧馬相如

牡丹用子堅韻

東風微雨過園亭  
國色朝酣近玉瓶  
去只須防白鹿開時  
還似綴紅翎  
春融幾處繁華地  
香逐誰家縹緲軒  
聞道洛陽花更好  
滿城如錦照青冥

送道士鄒泰宇祠親後還山

學道山中知幾春  
蓼莪詩廢重思親  
還家為奏生天錄  
入洞仍隨采藥人  
但使鄉閭稱孝行  
不妨林壑寄閒身  
題詩送別情如海  
它日煙霞願卜隣

賀鄧尚之除豐城虞衡

獻賦曾聞上玉京  
還鄉人羨錦衣榮  
論交未可輕負賤  
託好由來假弟兄  
萬里雲霄初發軔  
半生湖海却馳聲  
何當便把豐城劍  
且跨洪濤斬怪鯨

癸丑九日重登翠屏山

去年此日屏山飲  
醉挿黃華一兩枝  
歲月已同駒過隙  
江山重待客題詩  
元崖崑崙處雲霄  
近白鳥飛邊徑路  
危南望故園煙樹  
隔慈親應念到家遲

用子堅九日登高追和杜牧之韻

林下西風赤葉飛  
山頭幽徑紫煙微  
菊花更約明年賞  
客子曾孤此日歸  
時序百年懷往事  
江山千古帶斜暉  
曾聞神武

挂朝服甘向人間作布衣  
重遊何若巖東王何二高士  
紫霄岩畔重遊日澗水松風五月寒  
潭影靜觀雲漠漠藤陰危坐石團圓  
樵人解識衣冠舊羽士能留洞府寬  
自咲塵緣今未滿我時同跨月中鸞  
何同理和前韻見寄再用韻奉答  
月輪初上綵雲端岩穴風生洞府寒  
直欲仰天攀桂樹偶然吹邃坐蒲團  
龍光上屬星辰遠鶴駕東來海水寬  
咲問何仙在何許夜深應共女乘鸞

又畚婁良器

間把新詩卷裏看風流不似孟郊寒  
才高共惜年猶小別久還驚月又團  
庭樹葉飛秋思澗塞鴻聲斷海天寬  
明朝擬訪巖君去為說名家有鳳鸞

又答曾彥敬

林下柴門傍水安滿林風露桂花寒  
層崖聳翠千尋險明月當空一鏡圓  
雲氣恍疑遼島近水光猶似鑑湖寬  
無窮物色誰能賦同輩文章五色寫

送家舅吳先生往池州尋子時居虞衡之職

池陽副使心如水玉筍先生鬢若絲  
千里江湖憐遠別三年父子費相思  
微茫暝色沙頭樹慘淡離情卷裡詩  
目送雲帆煙水濶梅花開後是歸期

寄何伯善先生二首

華蓋峯高滄碧霄先生棲息絕塵囂  
門前松菊存三迳筆下文章冠六朝  
雅道久時傳子弟官情今已托漁樵  
相知最恨相送晚悵望雲山百里遙  
浮生已入無聞境幾度臨風感慨深  
朽腐不堪同草木辛勤



猶自惜光陰藏書小結山中屋對月常彈膝上琴一寸苦心  
誰為馮先生留墨重千金

夜雨候霽月色清明起視天宇悵然有故人之想曰  
呈樓君仲實為翌日遊巖之約云

向夕篝燈風雨殺中宵教戶月華明青天萬里看無盡旅館  
三更睡不成才薄豈堪明主用交深長憶故人情重崑細菊  
仙家酒明日相期作伴行

奉和丁御史遊南山韻

六石參天頗怪竒白雲深處有靈祠山開萬古煙霞洞松偃  
千年雨露枝仙客吹笙同子晉居人學圃愧樊遲送今此地  
還增價崖壁長留御史詩

丁御史枉顧不遇留題而去依韻奉謝

山中朝來澗水平黃梅雨歇松風清仙翁采葯久忘世野人  
卜居聊治生耕煙間放草間犢伐木喜聞林外鶯繡衣枉駕  
失迎候賴有小兒知姓名

次丁御史題羣玉山房韻

我家舊宅如蜂房移居竹圃安蒲床下頭惟有書劍在屋裏  
更立擔石藏靜愛吟詩宗鮑謝間思開徑接求羊先生肯作  
漁樵伴却笑時人逐利忙

壽何編修頌夫

馬蹄曾踏燕山雪鶴氅仍棲玉笥雲細閱丹書多道氣靜隨  
流水絕塵氛樓前碧嶂松千尺天際涼風鶴一羣滿引霞杯  
開綺席綵衣環侍搃能文

題鰲溪廖氏池亭用鄧伯明韻

龍門山中小有天華亭縹緲來飛仙石潭今古浴明月源水  
日夜流清川松杉雲表自鬱鬱蘭菊霜後猶鮮鮮天生好景

入圖畫何時登覽陪諸賢

寄鰲溪程則敬

龍門山中有奇士杜門不出鬢眉蒼  
收書隱几窓月白岸憤坐石松風涼  
心輕軒冕慕丹訣志在山水談青囊  
相思不見勞夢寐送別賢即心愈傷

耕樂為豐城徐以觀賦

早年勤學著才名晚歲躬耕樂太平  
白水滿田<sup>科</sup>蚪斗出黃雲垂隴鷓鴣鳴  
帶經或向桑陰坐飲犢時從澗畔行  
自是鹿門堪隱逸只愁天遣使車迎

筠雪齋為豐城黃尚英作

黃家移種瀟湘竹歲晏相看雪滿林  
白處恍疑仙鶴立靜中如聽老龍吟  
冰疑翡翠清無敵人倚琅玕冷不禁  
向日雪中逢老可臨風一筆直千金

寄高博士允憲

天上曾聞博士徵山中每憶故人情  
文章禮樂當時重富貴功名一羽輕  
老去定知添白髮退歸那得服黃精  
思君冰夜瞻天象還應微垣第彗星

送孫昌言之官廣東

十年勤苦抱遺經留得崑東映雪亭  
獻賦已趨雙鳳闕之官又向五羊城  
西風落日傷離別瘴雨蠻煙待掃清  
莫道遐荒淹儁軌隱之曾此著嘉名

寄曾孫稼劉彥文二公俱徒授清江

早聞曾氏傳忠恕復憶錙銖置墨莊  
喬木至今齊閭闔衆星猶自煥文章  
兩家託好從蘿舊百里携書道路長  
為寫新吟寄飛雁莫雲翹首意蒼茫

挽何仲疇

南朝人物數君家異代興衰一嘆嗟獨羨中流存祇柱那知  
清骨葬煙霞詩書在笈泛兒讀翰墨留香與世誇重過東橋  
堪洒淚春風吹落墓前花

挽姜仲實

翰墨論交四十年客中聞計獨潛然懷才祇向空山老繼志  
終看令子賢萬卷詩書存舊業千年松柏表荒阡欲知化鶴  
遊何處玉筍峰頭訪十仙

答何大鏞朱學淵

才俊終必摠入朝此生祇合老漁樵春秋未解窮三傳大學  
徒能究八條物外無心超世網間中有味酌山瓢故人上肯  
憐幽獨尋訪偏能過石橋

寄周存誠

百花寺裏曾相問報道攜琴正出遊惆悵不知何日會蹉跎

又是兩星周黃蘆白雁官洲月古木寒藤玉筍秋兩地相思  
千疊意不堪吟倚夕陽樓

謝胡廷琛惠智永千文及藤杖

數載論文樂有餘眼中高誼更無如藤分九節堪扶老帖賜  
千文許學書燕子日長揮翰墨桃花春暖步郊墟臨風感佩  
殷勤意欲報瓊瑤之所儲

贈鄭山人

千里江山一瘦筇幾多佳勝在胸中神蹤不閱牛眠處古莖  
猶存馬鬣封金筮玉魚追往事黃鸝碧草自春風登臨不用  
懷傷感萬古金陵氣鬱蔥

曾尚迪見訪失迎又辱寄詩奉答

懶慢無堪不出關喜觀書卷倦登山偶尋芝朮穿雲去却伴  
漁樵帶月還客至未同今日會鶴歸相對老夫閒來詩細把

燈前讀有約重論足慰顏

何大韶見訪失迎留題而去用韻答之

道人采藥不曾聞朝訪南山莫北山豈意軒車能遠出却過  
蓬華竟空還石泉未得全清賞詩句能題慰老顏自是陽春  
真寡和妙音還在盛唐間

題教膳部歸隱卷

承詔曾趨玉几前蕭蕭白髮許歸田誰知鼎鼐調羹手却校  
雲林種樹篇琴鶴共消閒日月樓臺長挹舊山川朝廷有道  
尊年德優賜行看下九天

題廖善立攬勝樓

層楹巍峩傍水涯幾陪名勝躡仙蹤梯九秋風月鈎簾處百里  
江山注目時黃鶴每當瑤席舞白雲時遠畫梁飛知君老去  
風流在長日簪花醉玉卮

喬木千章倚碧雲幾回西望祇思君舊家文獻今猶昔百世  
衣冠子又孫遠道每憐難會面高秋還擬一過門寄詩謾寫  
殷勤意水木當知共本源

送內弟吳子充之福州竹木場大使

萬疊雲山赴七閩一官猶似舊時貧朝廷不是勞征伐梁棟  
由來屬選掄芳草綠時兄送弟荔枝紅處子思親旁人莫笑  
干微祿毛義終為孝行人

送何端夫西遊

數聲寒雁楚天秋日送雲帆萬里遊海宇只今三戰伐山川  
是處入吟謳曾聞鑄劍成干莫祇恐乘槎犯斗牛我欲隨君  
漸倦翼夢魂飛到海西頭

寄嵯縣主簿鄒應端

會稽山水天下奇縣舍還聞對剡溪雲合四山環翠色月明

一棹弄清漪官閒不盡登臨興道遠寧云故舊思最喜素藤  
明似雪因風好寄近題詩

寄胡彥清彥忠昆季

伯仲才華邁等倫明時未許老林邱行看一鶚橫霄漢已見  
雙龍射斗牛剪燭每懷良夜宴棹船難共此時遊相思目送  
南飛雁腸斷西風起別愁

寄王鍊師時中

道人家住玉山隈繞屋青松一萬栽六月撒龍天上去九秋  
騎鶴月中回能揮寶劍除妖魅解使靈臺絕點埃何日攜琴  
一相訪洞門春暉碧桃開

寄曾主簿伯曼

玉笥山前話別離臨風猶記把征衣莫雲悵望如千里夜雨  
重論復笑時風急楚天寒雁過月明崖樹老猿啼知君自得

煙霞趣一度登臨一賦詩

和北平檢校謝叔賓

小年曾擬上幽燕老去仍棲玉笥前種秫欲求田二頃窮經  
初學禮三千畫間樹影琴邊落夜靜溪聲枕上傳寂寞山房  
求賦詠思君點檢白雲篇

丁巳十月偕鞠孟端曾伯曼龍恒泰姚子南子溪泛  
弟彥章遊玉笥夜宿法樂洞天分韻得仙字

涉澗捫蘿入洞天冷風吹面鬢蕭然白雲崖壁三千丈劫火  
邱墟二十年喜有丹書藏石室肯留詩客臥松煙夜深月冷  
聞天樂疑是瑤臺宴十仙

題道士陳玉京奉旨降香卷

代祀霍山羞壁幣退歸玉笥臥煙霞洞天明月一雙鶴澗水  
碧桃千樹花寶匣藏龍騰紫氣為爐伏火養丹砂長生有道

誰能似歲、朝元玉帝前  
次錙觀瀾為題羣玉山房韻

自咲鄙夫耽野趣  
結茆相對白雲岑  
蒼苔古木門前路  
明月清風世外心  
倚劔秋高看鶴舞  
吹簫夜半作龍吟  
故人若許來相訪  
祇向棲霞谷口尋

送何同倫攜家之武昌尋弟

令弟久為湖廣客  
好音還到滄江城  
一家十口相從日  
萬水千山送別情  
黃鶴樓高明月滿  
翠屏山好暮雲橫  
知君此去難重會  
後夜相思百感生

挽紹蘭長老

齊己才名自不羣  
遠公禪學更無倫  
曾同寺裏看明月  
忍向山中哭白雲  
法相本空心自悟  
去來無碍道長存  
誰知一滴曹溪水  
洗盡人間萬劫塵

次胡仲宣題山房韻

澗上漁樵隴上耘  
此身甘與鹿麋羣  
白雲冉冉峯頭見  
流水泠泠竹上聞  
崖石倚天猶鎖色  
莓苔經雨自花紋  
勞君遠寄山中詠  
絕勝天葩吐異芬

和何質夫見寄

我遊羣玉煙霞洞  
爾愛東橋竹水居  
兩地共憐風景好  
十年真與世情疎  
秋風白酒巖前菊  
夜雨青燈案上書  
多謝向來貽錦字  
至今光彩照茅廬

寄縣丞止信

所居扁有梅花處

遠樹微茫帶白雲  
可堪離思日紛紛  
數千里外聞歸隱  
二十年餘不見君  
陶令蕪田今種秫  
杜陵樽酒擬論文  
何時一訪梅花處  
坐挹清風悵素聞

答黎時高

白雲紅樹晚晴餘  
客子憑闌嘆索居  
搖落又驚時序改  
衰遲已覺鬢毛疎  
囊收枸杞還堪服  
架束溪藤久廢書  
多謝故人能下榻  
參回高枕似吾廬

為曾指揮題漢文帝細柳營勞軍圖

門深細柳未曾開  
持節方知大駕來  
天上恩光明日月  
營中號令肅風雷  
匡扶帝業非兒戲  
竦動天顏羨將才  
千載功明見圖畫  
臨風還拂舊塵埃

東黎祥叔

學士歐陽圭齋危太樸有詩文贈之

長身如鶴臉如霞  
俯仰乾坤傲歲華  
京國壯遊成舊夢  
滄洲小隱似仙家  
鳴琴夜對尊前月  
攜杖朝尋洞裏花  
我欲送君玩竒寶  
玉堂詞翰最堪誇

洪武壬戌夏六月詔徵天下賢良赴京擢用雅以非才例蒙郡舉適嬰疾病乃懇辭既歸辱親故枉問賦

此為謝并述鄙懷

秋風蕭颯鬢毛衰  
懷抱無因得自開  
林壑獨棲嗟已老  
朝廷三聘愧非才  
乞歸幸遂邱園樂  
訊問多煩故舊來  
謾寫新吟謝知己  
不妨共醉菊花杯

題嚴氏水竹居

清江、上足田廬獨愛嚴  
家水竹居林合翠光  
浮几席池分清潤到  
堦除參差夜月棲  
鳧鳳蕩漾春風戲  
鯉魚何日臨流一題詠  
琅玕節下為君書

春望和黎時高韻

俯仰人間歲月流  
偶同春望興悠悠  
桃花掩映東西岸  
煙水微茫上下舟  
白酒香生茆店裏  
黃鸝散在樹枝頭  
錦袍年少誰家子  
走馬看花樂未休

贈醫師湯謙亨

其遠祖平叔宋宣和間醫官

汴梁來任葛溪濱南度衣冠子又孫見說醫傳十六世不知  
功活幾千人縣壺物外乾坤小種杏雲中雨露深均向明時  
甘隱遯宣和曾著舊功勳

寄郭都事就覓藤杖

屏山分首經年別嶺海休官幾日還富貴已看榮故里恩威  
尤喜化諸蠻馬援蕙苾何須載陶令金英自可餐老我平生  
惟隱遯擬求藤杖共看山

送永豐曾仲省赴召

螢窗苦學擅才名鶚表橫蜚被罷徵白髮千絲憐我老青雲  
萬里壯君行文章盛代宗西漢日月中天屬大明入覲宜陳  
治安策賜官應校石渠經

寄黎子謙

抱琴曾訪碧山阿回首西風別恨多謝眺詩情元不改杜陵

肺氣近如何投閒慎勿憂餘事養性偏宜飲大和况喜山中  
有芝朮不妨頻采入煙蘿

送鄧吾貫往山東覲省

二十年餘隔清溫三千里外奉晨昏關河不憚驅馳苦天地  
難忘鞠育恩卷裏贈言勞杜史山東衣綵拜轅門嚴君若問  
家鄉事松菊依然滿故園

滄洲秋夜對月

長年為客寓滄洲時序堪驚興頗幽明月正當書館夜西風  
先動桂林秋來槎萬里思河漢倚劍三更望斗牛老去尚餘  
寒氣在浩歌散落大江頭

挽曾隱君大雅

生長屏山孝義門兩朝文物古風存菊松長日為賓主詩禮  
平生教子孫每喜從君論雅道不堪揮泪弔孤墳傷心最是



山頭鶴飛去飛來為失羣

挽曾主簿伯曼

曾承恩命佐殊邦多病歸田檢藥囊玉樹忍看埋土壤朱弦  
已復奏宮商千金子壯心何恨萬卷書存業未荒惆悵舊遊  
今已矣山房題詠墨猶香

挽廖縣丞止信

盛時文物晉風流天上歸來雪滿頭富貴十年成往事衣冠  
千古葬荒邱騎龍去後朝雙闕跨鶴猶疑在十洲一曲哀歌  
兩行淚飄零遺藁付誰收

題沈弟彥彰擁翠樓

樓倚東南萬疊山捲簾山勢盡迴環天開圖畫煙雲裏風引  
笙竽竹樹間詞客宴酣歌嬾、仙人飛過珮珊珊能修五鳳  
誇韓洎愧我才疎髻欲斑

御史丁公子堅與余為金石交而經歲不面殊抱快  
快甲子冬公重遊玉筍留舊館信宿既去余始自外  
歸為之悵然賦此奉寄

壯節高標御史公雄文佳句盛唐風蜚騰已羨同鷗鷺離別  
那堪似燕鴻窗外月明梅自發瓮頭春暖酒偏濃云由一遂  
重論約翹首東南望葛峯

送姚公獎往吉安府學送丁先生讀書

螺山雲白鷺洲晴送爾攜書赴郡城庠序共談新禮樂絃歌  
仍是舊師生劔藏寶匣光猶見玉遇良工器始成老我無庸  
還拭目圖南指日化鷗鷺

送姚孟才往淮安省親

寧親遠向淮安去把卷臨風索我題豈有才華當世重深知  
孝行古人齊江天日落雙鴻遠沙草秋高萬馬肥聖代祗今

多雨露將車應值放還時

答石室朱學淵

萬疊峰巒翠湧波君居石室興如何雲迷老樹棲元鶴雨過  
平池泛白鷺看矣已驚塵世換衛生猶喜古方多何時一訪  
煙霞裏徒倚丹崖共嘯歌

和丁御史子堅夏夜作

暗水三聲傍竹流棲禽未定忽啁啾月當虛牖繞深夜風入  
高松似早秋壯節有懷丁御史舊家空憶漢諸侯文章黼黻  
山房重一榻蕭然也自由

寄錫尚書子高

我回獻賦登青瑣一咲還山臥紫煙誥命已榮天子賜文章  
猶重世人傳元都任種桃千樹粟里宜耕秫滿田久仰高名  
誇盛業却慚疎懶負華年

和何大韶韻

白雲深處結茆廬門掩松筠宿雨餘正尔尋仙遊洞府不知  
騎馬到階除莓苔未掃經行點蕉葉仍留去後書近辱貽詩  
多好語始知名下士非虛

送陳伯良之京

早歲從師入泮宮盛年獻策吐丹衷九天雨露期沾沐萬國  
衣冠喜會同用世正須談禮樂銷兵已見樂耕農朋遊闕下  
如相問白髮蕭、左耳聾

山中和黎時高

學道猶疑隔塵仙葩采遍萬山春丹崖翠壁清高地野服  
黃冠自在人跨海未騎千歲鶴燒丹還養百年身知君二有  
求仙意羣玉峯頭日可親

挽李次晦

曾向天門聽珮珂，復歸林麓臥煙蘿。  
家聲舊說西平後，堂楫新成玉筍阿。  
止喜菊松娛晚節，不堪歲月抱沈疴。  
脩然一去成千古，四海用遊涕淚多。

荅外甥吳克善惠硯

吾甥遠寄端溪石，留向牕間伴老吟。  
試墨已看生黑霧，傳家无勝蓄黃金。  
一泓潤澤食元氣，半世研磨用吾心。  
攜到玉堂須有分，老人期望後人深。

雪中眺望

雲暗江南萬里天，雪寒材落幾家煙。  
梅花不辨溪頭樹，鶴駕虛迎海上仙。  
已喜乾坤消沴氣，佇看田野樂豐年。  
閉門不作袁安臥，驢背吟詩學浩然。

小樓間眺

江上歸來歲又殘，倚樓無事祇看山。  
筠松暝合微茫外，霧靄

晴分紫翠間，靜處乾坤真可樂。  
浮生塵土復何顏，舉頭忽見丹霄鶴，載我游仙也未難。

江上歸山中訪友

曾向煙波弄釣船，復歸茅屋聽潺湲。  
閒情一片宜松竹，白髮千絲照簡編。  
物外乾坤逢泰運，山中風雪度殘年。  
興來更把枯藜杖，尋訪梅花洞裏仙。

題醫師王允中松下對奕圖

曾向松根斲茯苓，更依松影對楸枰。  
延齡有待三千歲，勝敵何須十萬兵。  
動靜死生原自識，功名富貴本來輕。  
爛柯莫問當年事，看取金丹九轉成。

寄姚元齋兼柬陳學正

杏花時節喜相過，蓬鬢蕭蕭醉臉酡。  
把臂欲留情更苦，掉頭不住意如何。  
江山是處堪游覽，風月何人共嘯歌。  
見說南隣

有幽翹白雲千頃竹成坡

姚公觀瀾被里人誣訟死于金陵作詩哀之

雙桂樓前不忍過思君惟有淚成河  
湘游自此相知少世事從前未悟多  
玉樹冷猿啼樹裏金陵白骨返山阿  
一時憤死千年恨茅茹相連奈否何

暇日蒙子玉見招得陪諸君子燕飲甚大醉放浪形骸之外而不自知也因述一詩一作解嘲云

六十行年兩鬢衰秋風吹老芰荷衣  
白雲黃鶴堪為友流水青山總是詩  
物外游心如太古人前索笑似嬰兒  
坐中不着踈狂士那得諸公一解頤

九日

去年此日還為客今歲重陽暫到家  
黃菊不堪簪白髮西風休更落烏紗  
新籥蟻窠何妨醉舊事龍山亦可誇  
佇立蓋峯千仞表三窮幽思接烟霞

藤杖為友人賦

老藤絕勝江心竹嶺表分來九節完  
落手有聲落爪甲化龍無意作波瀾  
百年歲月堪扶老萬里山川得縱觀  
六擬穿雲采霧藥相邀拄到九真壇

采菊

客中底事又還家自引童孫采菊花  
亂葉不堪兼瑣碎繁英最喜得精華  
繡囊滿襯香生枕金盞輕浮色映霞  
明目絕勝餐枸杞延年何必煉丹砂

送陳仲蕙輸賦

江上梅花萬樹開送君東上鳳皇臺  
九天閭闔風雲會千里舟車負賦來  
雨露无私霑草木朝廷有道用賢才  
此行不負青年志裒惹天香得意回

挽陳敏恭

天地同生即弟兄可憐未識爾先傾白雲黃葉空山墓落日  
西風過客情往事不堪同幻夢流泉猶自帶哀聲從來賢達  
皆知命祇恨庭闈隔死生

夢故妻

歲晏江鄉夢故妻夢回愁絕聽鳴雞菱花不照雙鸞舞松月  
誰憐一鶴棲黃葉故山埋骨地白頭孤枕悼亡詩傷心最是  
門前水嗚咽長流無盡時

寄永豐教諭戴正心

戴君掌教恩江上正是皇朝全盛時文化今漸極南北才名  
久著浙東西雲霄萬里瞻丹闕庠序三年坐絳帷但使英才  
登俊造莫嗟微祿落久淹遲

鄧伯言玉筍集卷之五

七言物體

寄石門梁先生

山中誦道當隆平時人共說梁五經諸生長年沐化雨賤子  
獨夜瞻文星石門清天一鶴遠玉筍雲斂諸峯青明年容我  
操几杖擬乞文字留芳馨

江上有懷謝檢校叔賓

江樹歷々江風清獨立相思無限情功名期子上麟閣煙波  
老我尋鷗盟杜陵長吟悲白髮謝安久處憂蒼生行看三載  
脫衷絰遙望五雲朝玉京

用何元之韻寄何叔敬兼柬劉子博

渺然離思縈煩襟思君子兮在雲林吹簫石上老蛟舞采芻  
雲中幽鳥吟亭臺有酒秋月白門巷無塵春草深因風為問

錫子博學有餘閒時見臨

寄錫字泰

十年不見錫隱居閉門讀盡山中書固知風月滿懷抱還想  
雪霜侵鬢須江山遠隔離思苦鴻雁不來音問疎何時訪我  
羣玉洞共拂嵒花傾酒壺

山中對月有懷高文升

山月皎々山風清石泉竹根流細殺故人一月不會面賤子  
此夜難為情援琴再彈調更苦舉杯強飲愁還生是身安得  
生羽翼奮飛直到文江城

題吉水王氏山間

六月二日遊山間山人為我開雲閣清風一榻對松竹明月  
九霄聞珮環壺觴日娛賓客集城市不往軒車間知君養庶  
樂栖遯故我抱琴常往還

東張伯川

同郡能詩張伯川妙思湧出如春泉昔年曾作刀筆吏此日  
復種桑麻田松花釀酒醉明月荷葉製衣眠紫煙山中風景  
自可樂祇恐東帛來

次韻荅黎元復

幽人卜居誰與隣坐對青山忘世紛茹芝欲學黃綺輩生世  
幸逢堯舜君綸巾鶴氅靜觀易繭紙烏絲間綴文相看又是  
數年別事業日進過前聞

贈一村道人

山中有一村道人蕭然布衲烏紗巾心將白業付孫子坐對  
青山忘主賓嘯歌終日泉石趣呼吸太和天地春吾儒妙解  
三教理不須更說西來因

賀姚觀瀾昆弟新樓

姚家兄弟無與儔前後突兀成高樓棗華春日自相照燕子  
東風還獨留八窓雲氣連玉筍四壁圖畫看瀛洲若非仙骨  
寧好此祝君小住三千秋

哭同里何先生敬修因追悼曾侍郎得之

前年祖送曾禮部此日又弔何先生文章傳世如不死德義  
持身俱可稱五橋流水自鳴咽翠屏落月猶淒清哀歌一曲  
別千古二老有知那忍聽

夜宿孤山次王永安韻

四山陰、雲氣昏杖藜偶出遊南村故人邀我啟蓬戶清夜  
置酒盈斝尊菊松泉石自可賞富貴功名安足論人生所貴  
在勤學明日讀書還閉門

余鼓琴山中常恨無知音者鍾期既遇奏流水以何  
慚乃借大鏞韻賦詩一首以寫琴中之趣并奉諸君

一咲

天風蕭、吹樹林石泉冷、清我心呼兒洒掃舊茆屋坐石  
拂拭焦桐琴鍾期自可聽流水季子何用誇黃金故人於我  
喜同調為君彈作老龍吟

楚王府典寶鄧尚忠訪余叙宗族之好詩以贈之

江風蕭、江樹枯使君走馬尋郊居不嫌野老守貧賤肯同  
草坐論詩書鐙前斗酒暫為樂天上丹心思遠圖我家功業  
著漢代勗哉善保千金軀

鄧伯言玉筍集卷之六

五言長律

奉餞外舅之襄陽

外舅襄陽去江南草綠時夕陽沙上酒舊雨卷中詩雲斷吳  
天隔舟行楚岸移浩歌明月上長嘯遠風吹到想春將盡居  
應地最宜鹿門深草木漢水淨鳧鷖龐老神仙宅羊公德政  
碑覽竒應有作感舊莫生悲六矢男兒事千金賈客賢此行  
雖特達早發故園思

題吳仲亨種德堂

種德由先世承家見後人才名終不忝醫學更無倫崖石竒  
芝秀庭階玉樹新綠資培養力始見發生仁焚券非求譽懸  
壺足養真銜珠蛇不異守杏虎常馴浩蕩乾坤大涵濡雨露  
均清朝崇祿養堂上綠衣春



西庵畊叟為姚觀海賦

南徼風塵久西庵日月長健兒泛戰伐垂老事耕桑蔓草勤  
須剪松醪渴易嘗把書晴護麥看雨暮移床翠竹連蔬圃寒  
泉帶柳塘石闌風浙漉雲谷樹蒼茫牛牧侵晨牧豺狼入夜  
防烟霞成痼癖神物致休祥龐老身無恙陶潛興不忘蒲葵  
添散逸筇竹任徜徉了事輸租稅無憂足稻梁文尋高士傳  
詩咏甫田章既識浮生理須求不老方勗哉加飲膳擊壤待  
時康

蕭氏東隱 其曾祖翁

舊隱依東郭高風仰昔人棟梁經幾世文物見諸孫書學蕭  
雲草家非原憲貧田園深雨露籬落帶松筠涼月琴尊夜朝  
曦戶慵春鳥啼知節序燕寢適寒溫耕鑿當平世詩書裕後  
昆何須慕軒冕俯仰信乾坤

夜宿黃氏山莊

為愛溪山好未遊趁晚涼淡煙芳草徑華屋白雲莊環合峯  
千疊陰森樹兩行製衣思薜荔濯足愛滄浪地勝囂塵遠居  
幽興味長移床風滌暑展席月流光共說青囊秘頻分紫笋  
香明朝攜竹杖重與望前岡

送進士

昔記王洲別今看萬里行赤心歸聖主白首濟蒼生名為文  
章著時逢海岱清送客談禮樂次第取公卿日月明金殿鶯  
花繞鳳城遙知公退暇細閱石渠經

重題黃伯原友鶴軒

幽軒誰作伴老鶴日相親起舞能娛客飛來不避人雪霜明  
羽翮風月助精神豈羨乘軒貴曾看度海頻神仙元是友鸞  
鳳可為隣警露散何遠摩霄志不羣物情殊品類人道共彝

倫一曲南飛調因之更祝君

鄧伯言玉笥集卷之七

七言長律

寄劉隱君雲莊

前代衣冠數二劉雲初幾葉學弓裘吟詩自可傳千里習隱  
惟聞守一邱門外竹松還引徑花間池沼更通流藏修有道  
書連屋富貴無心雪滿頭久喜孫登同嘯傲却如顏闔避徵  
求冥鴻一去雲霄迴白鷺孤飛島嶼幽對月想彈流水操乘  
風未泛剡川舟相思日夕情如海何日芳尊話倡酌

題白沙陳氏翠竹間

千畝何須說渭川白沙翠竹尚依然偶逢溪處開三徑似覺  
高風繼七賢長夏清陰宜枕簟四時佳興寓觴<sub>絃</sub>繞檐迥覺  
紅塵遠巢鳳爭看彩羽鮮待長龍孫應萬箇欲裁汗簡可千  
年知君浩有淇園想題編琅玕復幾聯

挽鄒主簿應端

青楓江上結愁雲，一曲哀歌泪滿巾。  
富貴昔年成底事，山川何處弔孤墳。  
茫茫天地無窮恨，耿耿心懷莫共論。  
明月未歸華表鶴，高風寧羨北溟鯤。  
半生身世才名誤，萬卷詩書手澤存。  
令子承家親尚健，衣冠仍數道鄉門。

寄張助教美和

聖主無為萬國清，先生歸隱一身輕。  
寵榮百世留宸翰，辛苦平生在聖經。  
閉戶日長恒著述，杖藜身老尚逢迎。  
吟看碧嶂清江雨，夢繞紅樓紫禁城。  
四皓已能成遠業，二疏還可並高名。  
朝廷自昔尊者舊鄉邑，如今重典刑遠想風流。  
嗟未識獨慚疎懶，苦無成風騷謾效當時體。  
韶濩猶懷太古馨，俯仰乾坤同此道。  
睽離南北復何情，寄詩為說相思意。  
更約山中煮茯苓。

挽劉廉使楚奇

白鷺青原鍾淑氣，鳳皇芝草見禎祥。  
朝廷有道需才傑，嶺海無虞佐憲綱。  
暫假風霜清瘴癘，祇將忠孝感穹蒼。  
歲寒共喜堅松栢，世事那知變海桑。  
慷慨捐軀探虎穴，淒涼歸骨葬螺岡。  
忠魂萬古留遺恨，潛德千年有耿光。  
許遠不忘唐社稷，蘇卿猶著漢文章。  
哀歌有盡情無盡，稍悲風起白楊。

挽曾侍郎得之

聖主求賢問殆安，先生承詔起江干。  
百年事業存經濟，萬里雲霄振羽翰。  
制作畫稽周典禮，風流不減晉衣冠。  
丹墀奏對天顏近，畫省論思月色寒。  
道學每期千載重，文章祇用後人看。  
病思啟篋焚遺藁，詔許還山別上官。  
記就玉樓仙夢遠，粉書丹旆客心酸。  
祠堂萬古屏山麓，松栢參天集鳳鸞。

贊芋知事希曾十韻

臨江知事揚州客漂泊風塵歷歲年老大獨憐雙鬢改亂離  
兼喜一家全山中寓隱泛門掩松下遨遊任履穿經雨欲鋤  
栽竹地久晴思引灌花泉朋來問字能携酒客至求詩每費  
牋政譽已聞天上有才名姑與郡中傳飛騰萬里曾如願留  
滯三年暫息肩貧似杜陵收橡粟興同彭澤憶蕪田黃麻有  
待恩光及白屋深期惠澤宣感激為公歌此曲異時相率共  
留鞭

揚花用丁御史韻

綠楊堤上起鮮飈無數飛花映日嬌稍近樓臺度簾幙忽露  
杯尊絢瓊瑤灞陵吟望春偏好彭澤行尋路匪遙照眼適同  
張緒態多情渾似小蠻腰輕隨蝶飄隣圃急送遊人過市  
橋村白不禁芒履踏店香須赴酒家邀難收弱絮泛衣薄錯  
認柔絲把鬢撩搖蕩度江千萬里顛狂辭樹兩三朝殘春莫

怪猶飛雪明日重看定化藻底事詩人頻賦詠繡衣曾惹上  
丹青

鄧伯言玉筍集卷之八

七言絕句

玉筍十詠 魯伯曼命題

玉筍晴雲

三十六峯香難分 上有佳氣常氤氲  
安得良工拂絹素 畫我山中眠白雲

紫蓋春雨

紫蓋突兀青天低 老鶴結巢松樹枝  
坐看山色淨如染 正是東風過雨時

何君駕虹

紫霄何年駕彩虹 三十萬里登瀛蓬  
至今岩洞有遺蹟 碧桃爛漫搖春風

石人翫月

望夫化石千古名  
翫月如人千古清  
梅花峯上月皎  
此物無情如有情

雙林蓮社

尋僧幾向山中來  
芒鞋踏破青苔  
雙林絕似東林好  
亦有白蓮無數開

孤山梅隱

孤山山中小有天  
時有隱者來盤旋  
梅花如雪千萬樹  
徒倚月下懷逋仙

綿峯瀑布

誰拖素練千尺長  
乃是絕壁飛流淙  
上人洗鉢坐崖石  
慣聞水樂鳴鏗鏘

繭溪澄練

繭溪下送西北流  
明月正照蘆花秋  
光涵暎一匹練  
天地與我同虛舟

與我同虛舟

南祠夢閣

化龍樓閣成墟邱  
世人無夢登瀛洲  
倦來偶枕松下石  
天風六月涼如秋

東嶽行宮

岱宗如何齊魯青  
魯侯昔祭山之靈  
江淮遠隔數千里  
空山落木看祠堂

題秋月上人所藏洞庭秋月圖

君山木落洞庭秋  
今古無窮水自流  
明月一輪天宇靜  
空室中疑是汎虛舟

雪

一夜天花滿世間  
羣峯失却翠雲鬟  
何由騎得仙家鶴  
看徧東南萬玉山

題扇  
林間樓閣護煙霞  
門外山童掃落花  
小澗石橋人緩步  
抱琴來此訪仙家

題昭君圖

一曲琵琶千種恨  
百年圖畫幾人看  
君王不是無恩寵  
海宇因之得奠安

間居

一林修竹滿庭陰  
四壁圖書太古心  
俯仰乾坤觀物理  
悠然魚鳥自蜚沈

題觀海圖

滄溟之濶幾千丈  
萬頃鏡面涵空虛  
何不翻身入海底  
九重淵內探驪珠

題畫扇

青松掩映白雲間  
雲自無心我自閒  
靜聽松聲作琴響  
孤鷺別鶴不須彈

為吳叔昌題畫扇

山中老樹半榮枯  
煙際茆亭似有無  
白髮兩翁携稚子  
衣冠疑是列仙徒

客夜

芙蓉葉上雨瀟瀟  
一盞殘燈照寂寥  
久客不堪鄉思苦  
誰家兒女又吹簫

洞簫吹徹思悠悠  
雲散江天月滿樓  
倚徧闌干風露冷  
數聲孤雁落滄洲

采蓮曲

粉黛粧成宮樣新  
汗凝微澹紫羅巾  
絕憐來往西湖上  
貪看荷華不顧人

綠荷深處水生波三五蘭舟載綺羅華月漸明風漸息吳人  
愁聽越人歌

賦謝仲寧帟帳

溪藤百幅淨如練裁作斗帳同君清覺來滿洞白雲起耳畔  
更聽松風聲

重遊何君有感

板橋流水石磯平幾度經行酒未醒試問隔堤楊柳樹為誰  
搖落為誰青

哭出家從祖德林真人

萬里天風送珮珂一邱煙雨暗松蘿傷心二十四澗水不及  
諸孫涕泪多

對桐樹

丈夫志氣頗英豪流落茲山嘆未遭却羨翠桐門外樹小窗

坐見云簷高



鄧伯言玉筍集卷之九

朝京紀行

應制賦鍾山雲氣  
五寒詩首句乃御製也

五寒雲鴻濛維時屆嚴冬  
乾坤既定位造化乃有功  
聖人昌國運父老歌年豐  
鰲足立四極鍾山蟠一龍  
風雲常變化草木自葱蘢  
帝德邁三五君門深九重  
金陵執佳麗芒碭氣鬱葱  
永世立基業群經知統宗  
華夷遵教化臣子效精忠  
三誥比謨典萬幾思始終  
憂民至懇切論道每迭容  
田野被休澤閭閻還古風  
咨詢及耆老歌舞效兒童  
承詔上金殿命題勞聖衷  
臣才實蹇澁臣貌復龍鍾  
豈有涓埃報深知眷頤隆  
上林春欲動大地雪猶封  
何物奈寒氣青、萬年松

早朝

九重城闕五雲中  
萬國衣冠拜袞龍  
道德仰瞻天地大  
車書

復見古今同鳳皇池暖春先動鵝鵲樓高雪正融頭白趁朝  
沾聖澤幾回吟對萬年松

贛周參議名倬字雲章豐城人

秘閣曾看萬卷書文章政事近無如豐城兩劍除妖魅北極  
諸星拱帝居海宇無疆歸正統朝廷有道用真儒攀龍直到  
九天上附驥何當萬里餘涸轍久思求活計侯門那得曳長  
裾春風倘借吹嘘力寒谷春生槁朽蘓

新淦曉發

淦水東頭曉發船邑人爭看去朝天老人星現當平治聖主  
恩深被寵宣身到九重依日月路經千里越山川此行得遂  
平生志歸課兒孫種秫田

南津夜泊

南津橋頭明月多客船夜泊發謳謔五更霜寒聞畫角千里

帆開揚素波朝廷有道恤耆老天地無私含太和妙音佇聽  
奏韶濩九重城闕高嵯峨

晚宿清江

金鳳洲前落日低清江城下泊城船時白頭總是朝天客黃柳  
齊攀繫纜枝萬里雲霄悲旅雁千家砧杵搗寒衣明朝擬拜  
黃堂守却駕天風去似飛

泊樟鎮謁寶金山

清江之水清悠悠行人發棹江之頭封溪晚泊集千艇寶金  
晨謁登層樓山川感慨今古事草木變衰天地秋我來再拜  
何所祝四海永清蒙帝休

晨起

曾送玉洞看雲松又向金門拜袞龍四海豈無青眼士滿頭  
俱是白頭翁夜瞻斗柄天旋左朝望扶桑月上東最喜太平

今有象賜歸何幸樂年豐

到江西

朔風吹雁不成行獨起掀蓬思渺茫  
萬里青天看北斗數穀柔櫓下西江  
滕王舊閣何年廢孺子高名百世香  
我欲題詩紀彤骸氣衝牛斗筆如扛

欲到豐城不果

可惜豐城地船中瞥眼過樓臺  
新雉堞戎馬舊山河龍劍知誰得  
虬鬚奈老何臨風屢回首重到恐蹉跎

孺子亭觀東湖

西山含夕照征棹泊鍾陵  
未上滕王閣先遊孺子亭  
古今留勝蹟江海寄閒情  
試問東湖水何人此濯纓

滕王閣

天下幾多奇絕處滕王獨愛此  
淹留山瞻廬岳九千丈地控

荆蠻十二州天上星辰分翼軫  
閣中風景自春秋朱簾畫棟非疇昔  
江水依然萬古流

鉄柱觀

鉄柱井中央蛟龍久遁藏  
神功配天地劍氣厲風霜  
世已除妖孽仙猶託混茫  
應知萬古為國鎮西江

樵舍

樵舍臨江滸柴門數十家  
驛亭依柳樹客棹泊汀沙  
歲晏風霜肅天長道路賒  
舟師告羣老十日到京華

昌邑山

水落江心正人行岸脚斜  
祠神過水府倚棹近漁家  
飲啄宜沙鳥漂流愧客槎  
戍兵嚴警邏為報上京華

望湖亭

鄱陽水落一匹練廬阜雲開九疊屏  
不是坡仙有題咏老夫

無意上湖亭

望湖亭讀坡仙詩景仰高風重題四韻

不識眉山蘓學士望湖亭上憶高風心胸自可吞彭蠡眉宇  
何如見華峯舊日題詩留篆刻平生為國守精忠文章千古  
誰能似湖水滔日日向東

吳城山

西湖水落天風寒維舟又上吳城山禪林樓閣爛金碧洞府  
神仙鳴佩環浩、乾坤寬眼界翮、鸞鶴下雲間登臨正樂  
催行急詔許龍墀趁曉班

吳城山聽碧山上人誦法華經

飄、空裏落天花靜聽山僧講法華我亦平生無住著白雲  
深處即為家

星子縣阻風

冬十二月朝天關我船正泊星子灣祈禱已謁晏侯廟舉目  
更望匡廬山風濤洶湧阻行色歲事崢嶸悲旅顏是身安得  
生羽翼飛上九天渾未難

鄱陽阻風

廬阜千岩雪鄱陽萬里風驚看白頭浪愁殺白頭翁

廬山

五老擎天壓厚坤江南惟有此山尊千巖樓閣多仙佛四面  
峯巒似子孫飛瀑恍疑銀漢落懸崖時有白雲屯何當獨跨  
山頭鶴萬里飄、朝帝閣

過彭蠡

東湖水西湖水日夜流滙彭蠡揚闌左里何渺茫萬頃鏡面  
含天光廬山高聳湖水上屏風九疊例影湖中央湖光山色  
兩奇絕翠靄丹霞互明滅夜深明月落波心疑是驪龍吐珠

光煜、湖水復湖水，滴、流向東，何當載我上京國，却尋五  
老巢雲松。

九江口

路出九江口，山瞻五老峰。天高飛鶴鶴，浪暖化魚龍。極目微  
茫外，揚帆浩蕩中。觀流問源委，巴蜀此相通。

夜泊南康

向夕繫扁舟，南康湖水頭。角聲雲外響，燈影浪中搖。漂泊憐  
衰鬢，謳謔答聖朝。北風阻行色，明發待齊橈。

湖口

縣舍臨湖口，僧居倚石巖。路斜通柳市，風急挂蒲帆。異境堪  
圖畫，同舟共笑談。爭知種田者，頭白著征衫。

彭澤

山通彭澤縣，天設海門關。萬水瀦清濁，千艘度險艱。望洋今

日嘆承詔幾時還，欲訪陶潛宅，聞風有愧顏。

采石

蛾眉亭上奏朱顏，采石江邊月滿船。惆悵謫仙何處在，醉中  
猶伴老龍眠。

采石酒樓

采石江頭問酒家，酒樓兒女貌如花。金杯滿勸歌聲緩，銀燭  
高烧舞影斜。

觀潮有感

潮去潮來朝復暮，花開花落雨兼風。由來萬化皆消長，惟有  
青山今古同。

太白墓

嗚呼李太白，今古詩之豪。心胸自可小，溟渤富貴何如輕羽。  
毛平生所樂在詩酒，醉來筆湧春江濤。貴妃捧研足榮寵，天

子賜之宮錦袍風流既往不復見殘膏剩馥沾吾曹吾曹碌碌不足數采石江頭拜詩祖當年捉月事渺茫千載清風一坏土

安慶弔青陽先生于廷心

江雲淡々江水清弔古又上舒州城青陽先生不可見群玉山人空復情一門骨月死貞節千古文章留姓名高風激列孰能比李徽守譚當並稱

青陽先生



